

Mea owera Iesu sapuwo to Mareko ro gisioidiro

Mea Owera Mareko ro Gisioidiro, Bamu
Owera ato

Nedi urubia ro buka woko neio ro
gosioidiro-rimo:

owera kiwesegere orobo ra uramu ra
kiwarebai orobo ra uramu ra
sabowa ato owera kowaibia urubia
saro rido iana kowaibia dubu, urubia mutu

Iesu gabo Ioane ro gemaipo-ro

¹ Mea owera Godi edi mere ro Iesu nou
sapuwo to neido garatamuai.

² Keba ia tau ato Godi ipusu owera dubu
Aisaia nou ro gisioidiro nedi owera ro Godi edi
mere ro nou sapuwo to. Nou ro ibo, *Godi ro iato
gutura, Keba moro to anama-emeiriai-ri ata
sowake dubu oro gabo nou ro ama-emaipo-ri.*

³ *Nou ro kaunene ama-iarotiti-ri goto se
duriomoro ato. Nou ro ibo, Abera naramu gabo
mea se ba-demesioidiro-mo! Nou gabo tuputupu
se ba-demowou-mo!*

⁴ Ina noudo ie Ioane goto se duriomoro to kou
urubia obo to iato iwarumiautititi. Ioane ro ibo
witomutiti, 'Ba-derewesegerai-mo ubauba
aboudo! Nio ubauba aboudo
namadime-erewesegerai-ri, nio mo ro obo to
nato anama-iwarumiauti-ri Godi ro imese
ama-imatopeamuti-ri nio edi ubauba ro.'

⁵ Iudia duriomoro urubia Ierusarema urubia
mutu neio imese ta-wirohotiti-mo Ioane aboto.

Taie neio simara ubauba na-giwapotaidiro-rimo, iato Ioane ro neio obo to aise giwarumiauti.

⁶ Ioane mea obotama iroidirotiti pua, nou kemoro musugamusuga obotama bage to erematahirawadotiti nou giworohuti, ibose mea ohona ihotiti pua nou ro pugo nogobe mutu nou wihotiti.

⁷ Taie Ioane ro neio iato imowautititi, 'Ata dubu tou-die nou auna pupuwo dubu e, mo marasio ie, mo modobo ia pua kiroborea nou sairo mabu ato, nou sairo sigibere kemowiuti aboto mabu nou gebari pere ia ie.

⁸ Nio abora mo ro obo to niwarumiauti. Nodi dubu ro nio nou ro Tarena Urío to ama-iwarumiautititi-ri.'

Iesu obo to gowarumia Ioane ro

⁹ Iedi tau ro nato Iesu Nasareta sabowa Gariri duriomoro ato na-owamo nou ioudo godori-ro Ioane bato gomidiro nou neito gou-ro. Iesu obo to iato gowarumia Ioane ro Iodeni oromo kainai ato.

¹⁰ Iesu beda tau ato gerebua-ro obo maumo rido nou ro toboro kerekekeai se gowea, iato Tarena Urío ioudo na-gororuwo-ro kororosowa mino to gororuwo-ro dumu sosoro Iesu abato aise gomi.

¹¹ Taie ata owera kodu ro iato gou-ro Adiri sabowa rudo ibo, 'Oro mo ia mere ie. Mo auna natonato ie oro aboto, ina ibose mo auna kamade ie.'

¹² Taie Tarena Urío ro Iesu imese gewedei goto se duriomoro ito

¹³ serawo tumu na bato irowomidirotiti nou iato imidirotiti 40 saiki ti-giporeai. Iesu nou goto

se duriomoro ato na-imidirotiti iato Satani ro gou-ro nou aboto, taie nou Satani ro iato gowaibirio. Godi sowake urio na-gou-rimo nou neio ro iato gowarebai-rimo.

Iesu ro 4 urubia girapoi

¹⁴ Ioane obo to kiwarumiauti dubu dibura to na-gedea-rimo Iesu nato gidiai-ro Gariri duriomoro to.

Taie nou ro mea oweru Godi aboudo urubia iato wimowautiti,

¹⁵ 'Godi ro mea tau ta-gohodowa nou ia ro urubia kiwaboi dubu to kararapoi. Iedi tau ro aupise neito korowateai ie.

Ba-derewesegerai-rimo ubauba aboudo! Mo edi mea oweru ro nou se ba-dimibiria-mo!'

¹⁶ Taie iato nou ioudo na-godori-ro Gariri obo paruo bara to nou ro naramu ra neama ra nato giwia-ma, Saimoni ra Enduru ra neitiro neti gidobi-rido.

¹⁷ Nou ro nato gutura neitiro aboto, 'Dou-rido, mo dowasoro-rido! Nitiro nakere na-irobotiti-do, ina nitiro mo ro anama-imasouti-mari urubia kirobo tanaro beda sosoro ra.'

¹⁸ Taie neitiro edi oweru ro na-girowai-rido neti aise gimeserai-rido Iesu imese gowasoro-rido.

¹⁹ Iesu ina imese gadoro Gariri obo paruo bara ato ina netewa teibo dubu teibo nou ro nato giwia-ma, Iemisi tiro Ioane mutu neitiro Sebedi mere teibo ie, pe ato gomidi-ro-rido neti gimododiai-rido.

²⁰ Iesu ro ibo, 'Nitiro dou-rido mo aboto mo dowasoro-rido!' Neitiro ro na-girorowai-rido edi oweru ro neti aise gimeserai-rido neitiro abera

Sebedi nou woko rubi mutu na-gorowomidiro neio imese pe ato aise gimeserai-rido taie Iesu iato gowasoro-rido.

Iesu ro ubauba urio urubia dubu aboudo gemabodorai

²¹ Iesu kowasoro urubia mutu neio imese gou-rimo Kapeniama sabowa to. Taie ata komidiro saiki ato neio imese godoro-rimo karadabu moto to, Iesu nou kitamudiro iato imese gatamuai.

²² Urubia sirio ta-godoro-rimo ito ina neio ro nou kitamudiro tanaro na-gemowea-rimo neio boroboro ro girobai mabu nou ata sosoro gitamudiro, ibo pua Mose sabi kitamudiro urubia neio sosoro kitamudiro. Nou ro na-gitamudiro nou simara korosa mutu gitamudiro.

²³ Ina ata dubu na-gomidiro karadabu moto ato nou ubauba urio ro goworohuti. Taie iedi dubu ro nou aboudo ubauba urio ro garo-ro ibo,

²⁴ 'Nasareta dubu Iesu, oro nimo aboto etou tanaro amadi-osioidiro-ri, oro neito nimo ubauba iwai ri a-wou-die ra? Mo umoro ie oro Godi edi Tarena Dubu oro nou se ie.'

²⁵ Iesu ro masawe to nou iato gemowasiai, 'Oro owera deremasiai, oro abora se dosuruwo-ro ioudo!'

²⁶ Iedi dubu ro nou ro ubauba mino to geteamo, auna iamo garo, taie ubauba urio iato aise gosuruo-ro nou aboudo.

²⁷ Urubia ro na-gowea-rimo neio aborabora ro girobai taie neio nakara se iato geremodoruti-rimo, 'Nou etou tanaro isioidiro! Idaibo sosoro kitamudiro nimo ro kiauri pua.

Nou ro korosa ia mutu itamudiroditi. Ibose nou ro kutura ato ubauba urio aboto neio ro nou owera kirorowai ato aise kisioidiro ie.'

²⁸ Taie Iesu beda sosoro tanaro gisioidiro iedi dubu ro nou aboto iedi owera ro samo to gorobodorouti Gariri duriomoro ato.

Urubia temeteme aboudo Iesu ro meana giwaititi

²⁹ Iesu Iemisi ra Ioane ra mutu karadabu moto na-gemeserai-birimo imese gou-birimo Saimoni ra Enduru ra moto to.

³⁰ Iedi moto ro nato Saimoni emapura abere kabena ro gowati, urubia iato na-gorowotoi neio ro Iesu nato gemowapotai-rimo nou temeteme sapuwo to.

³¹ Taie Iesu imese gou nou korobu moro to, mabu nou nirimagare goi nou aboto, nou ro tu rido iato aise gorobai-ro imese gowomi mea mino to, nou ro beda tau ato gosioidiro edi tanaro ro nou kabena ro hio to iato aise gemeseruti. Taie iedi abere ro kabena ro na-gemeserai neibi ohona nou ro iato gimoworoho-ibiro.

³² Ina Iesu aboto sabowa urubia ro temeteme urubia nou ri giworoho-rimo adimo duwoduwo ato. Urubia ro ibose to giwaboidiro-rimo arua rubi ubauba urio ro na-iworohutiti-mo iedi urubia ro aise giworoho-rimo Iesu aboto

³³ womu tato iedi moto ro nato Iesu urubia sirio ro imese ti-gemosopa-rimo.

³⁴ Iesu ro imese temeteme rubi nou ro meana giwaititi etio ro giworohuti-rimo temeteme nou ro imese mea na aise giwai. Ibose Iesu ro arua rubi aboudo ubauba urio iato gimabodoidiro. Ata ubauba urio kemabodorai ato nou ro aise

kemowapotai ibo, 'Oro oweru orowauti ate mo sapuwo to!' Nou ro ibo giwati mabu ubauba urio umoro ta-goi-rimo Iesu beda dubu ra.

Iesu Godi mutu geremowauti-rido

³⁵ Iesu omona kakaba oweru ato geribua moto na-gemeserai imese gidiai nakara moro to Godi mutu eremowauti ri.

³⁶ Saimoni bi na-giriribua-birimo Iesu neibi ro iato gosora-birimo.

³⁷ Taie neibi ro na-gowea-birimo, Saimoni bi ro ibo, 'Imese rubi oro osora-dumo.'

³⁸ Ina Iesu ro ibo, 'Neibi arua sabowa to moroho-birimo aupise na-iamo, urubia iato nama-imowauti-ri mea oweru, mo neito nou mabu ato nou-ro.'

³⁹ Nou na-irohotiti sabowa gabogabo Gariri ato nou idaibo tanaro nou wisioidirotiti. Nou ro ta-imowautiti karadabu moto ato mea oweru, ibose nou ro ubauba urio ta-imabodoidirotiti arua urubia aboudo.

Ata katio dubu meana gowai Iesu ro

⁴⁰ Ata dubu nou durupi katio ro ta-goporeai nou Iesu aboto nato gou-ro. Iesu nou ro na-gowea nou aise gomi kauhio to girimusubua taie Iesu nou ro iato gemediai, 'Oro ubi ra mo meana kowai aboto? Mo umoro ie oro aboudo modobo ie.'

⁴¹ Taie Iesu ro nou oweru na-gemororowai nou auna nirimagare goi nou aboto. Nou durupi nou ro iato gemowasomai, nou ro ibo, 'Mo ubi e oro meana kowai aboto. Meana doi!'

42 Taie iedi dubu ro hio to nou edi katio sirio ro samo to aise gikokoiriai-rimo nou meana ina aise goi.

43 Taie nou Iesu ro auna se iato gotomu,

44 'Oro neido ba-dou ata mere ata oro ro emowapotai ate, kaupoti oro ba-dorowapotai Godi ra urubia ra turituri dubu aboto, ina nou ro oro batina namabu ama-emematowo-ri Godi aboto mabu abora oro meana ta-woi. Nou ro oro batina namabu kemematowo Godi aboto Mose ro beda sosoro owera to garo ibo ba-memesioidiro. Ina idaibo tanaro nama-osiodiro-ri urubia umoro nou ro ama-iwai-ri ibo oro meana ta-woi.'

Taie nou iato gemeiriai Iesu ro.

45 Iedi dubu ro Iesu na-gemeserai nou imese gorowameai-ro, kaupoti Iesu beda owera garo nou ro osiodiro pua. Nou ro urubia nagi-iwia-ri nou ro iato gi-imowauti-ri ibo, 'Mo Iesu ro meana ta-nowai.' Sirio tau ibo wirowatititi womu tato Iesu sapuwo to owera imese ti-gorobodorouti. Iesu urubia ro auna se emosopautiti-mo ina noudo ie nou kodouti tato arua sabowa to, nou ata moro to gi-ou-ri urubia korowomidiro tato duriomoro nou neito kou e. Kaupoti urubia sirio neio ta-irohotiti-rimo nou aboto sirio sabowa rido.

2

Iesu ro togiri dubu meana gowai

¹ Iesu nakara moro ato ta-imidirotiti, arua saiki na-goroporeai-rimo ina ioudo gorowameai-ro Kapeniamasabowa to. Urubia ro na-girowai-rimo Iesu korowameai owera

² neio imese sirio se aise garadabuti-rimo nou owerara gare emedea ri. Nou beda moto ato gomidiro imese ta-gemosopa-rimo taie nou ro urubia iato imese gitamudiro.

³ Iedi tau ato nou ro na-gitamudiro arua rubi ro togiri dubu nato gowou-rimo,

⁴ neibi gabo egea se giosora-birimo nou kowodoro aboto. Nou taratara ato gorobu neibi ro nato gowodoro-birimo Iesu aboto, neibi ro modobo pua Iesu aboto hio to kowateai. Taie neibi kimaragoidiro nato giwia-birimo ibo modobo ie neibi ro ohu to kowioro ohu rido pito nato namabime-emepito-ri, neido namadibimo-owororuwo-ri. Taie neibi ro nedi tanaro na-gosoidiro-birimo, pito kemepito moto ohu rido taie imese gowororuwo-birimo Iesu aboto.

⁵ Iesu ro ta-gimasibai-bi neibi kimibiria mutu gosoidiro-birimo taie nou ro nato gutura, 'Mo mere abora oro ubauba tanaro patu ta-nematopeamuti.'

⁶ Kaupoti Iesu beda moro ato gitamudiro iato, Mose sabi kitamudiro urubia ta-gorowomidiro neio iato gimaragoidiro-rimo nakara se Iesu beda sosoro owerara to gutura. Neio ro ibo,

⁷ 'Nedi dubu ro idaibo sosoro owerara etou mabu ato utura? Nou ro Godi masiro ubauba ta-owai. Godi kaupoti nou se ie ubauba nou ro kimatopeamuti ie, nedi dubu ro nou ro modobo pua.'

⁸ Iesu ro neio kimaragoidiro patu ta-gimaritiawado, neio beda sosoro gimaragoidiro-rimo. Taie nou ro iato gutura

neio aboto ibo, 'Nio mabu boira idaibo sosoro kimaragoidiro na-imaragoidiro-dumo?

⁹ Beda sosoro ra mea se nedi dubu ro nou aboto kutura ibo, "Oro ubauba tanaro patu ta-nematopeamuti" o ibo kutura "Oro deribua, taratara daratai, dou!"?

¹⁰ Nio umoro ba-doi-mo ibo Imese Urubia Kiauri Dubu mo nou e, ibose mo abato korosa towamo urubia sirio ubauba kiatopeamuti aboto. Ina ba-diauri-mo!'

Taie Iesu aise gerewesegerai iedi togiri dubu nou aboto, nou ro ibo,

¹¹ 'Oro deribua! Taratara daratai! Dou!'

¹² Iedi togiri dubu ro aise geribidiro-ro nou taratara na-garatai taie imese gosuruo-ro.

Nou ro edi tanaro na-gosoidiro urubia sirio ibose ti-girarowo-rimo neio imese auna ia se gimaragoidiro-rimo. Ina neio ro Godi iato gemowabu-rimo ibo, 'Nimo ro idaibo tanaro kiauri pua, nou abora tanaro ororosoidiro!'

Iesu ro Riwai garapoi

¹³ Iesu ina imese godori Gariri obo paruo bara to iato goroho. Nou iato na-goroho urubia sirio nou aboto nato garadabuti-rimo. Taie neio nou ro na-giwi iato gitamudiro.

¹⁴ Urubia kitomu na-goporeai, nou ina nakara se obo paruo bara ato imese gagegeidiro. Nou ro iato Arapisi mere gowea Riwai, takesi kimade moto ato na-gomidiro. Taie Iesu ro nato utura Riwai aboto, 'Iedi woko ro demeserai takesi mani kimade, abora dou-ro mo dawasoro-ro.' Taie Riwai ro edi owera ro na-girowai nou woko aise gemeserai Iesu aboto iato garadabuai-ro.

¹⁵ Taie iedi adimo ro nato Riwai moto to Iesu imese gou ohona iho ri. Urubia sirio ito garadabuti dorogora se urubia takesi kimade urubia, neio Iesu kowasoro urubia mutu atu moro to na-garadabuti-rimo taie iato ohona imese giho-rimo. Sirio takesi kimade urubia neio Iesu kowasoro urubia to ta-gararapoi-rimo. Ibose dorogora se urubia sirio Iesu neio ro gowasoro-rimo.

¹⁶ Mose sabi kitamudiro urubia neio arua Parasi urubia to ta-gararapoi-rimo. Neio ro nato gowea-rimo Iesu dorogora se urubia, takesi kimade urubia neio mutu atu moro ato ohona na-giho-rimo, taie neio aise gou-rimo Iesu kowasoro urubia neio ro iato gimodowa-rimo, 'Mabu boira Iesu idaibo urubia mutu atu moro ato kiho?'

¹⁷ Neio ro iedi owera ro na-gutura-rimo Iesu ro ta-gimorowai. Taie nou ro nato gimowameai ibo, 'Dokota temeteme tato urubia aboto ou-ri pua, nou temeteme urubia aboto kou e. Mo woko idaibo sosoro ie, etio ra imaragoidiro-dumo ibo, "Nimo meamea urubia ie", mo neio sapuwo to ou pua. Mo a-nou-ro etio ra imaragoidiro-dumo ibo, "Nimo ubauba urubia ie", io mo neio sapuwo to nou-ro.'

Tagara tanaro orio tanaro mutu imasaupiai-ri pua

¹⁸ Ata saiki ato obo to kiwarumiauti dubu Ioane nou kowasoro urubia Parasi urubia mutu neio ohona kiho tato gorowomidiro. (Parasi urubia ro Iu urubia sabi patu auna ia se girobidiro-rimo.)

Taie arua urubia nato gou-rimo Iesu aboto neio ro nato gutura-rimo nou aboto, 'Ioane kowasoro urubia Parasi urubia mutu neio abora ohona kiho tato orowomidiro-die, kaupoti oro edi kowasoro urubia ro ohona neio ro tiho-dumo, io mabu boira?'

¹⁹ Iesu ro nato gimowameai, 'Orio domere nou orobo kedeia ato, nou namuturubi ohona kiho tato korowomidiro ra, a? Orio domere nou idaibo tau ato na-omidiro nou edio namuturubi ro ohona kiho ie

²⁰ kaupoti ata tau amadi-ou-ri nedi orio domere ro simara urubia aboudo nato amadimo-owatateai-ri. Iedi tau ro nato nou namuturubi kiho tato nato ama-orowomidiro-ri.

²¹ Ina ibose ata mere tagara sodo pito kowaruwouti ato, nou ro modobo pua orio obotama kere to pito kowateai mabu kowiouti ato, iedi obotama kere ro aise keretebuti ie, ibose edi tagara sodo ro nou pito auna aise kowai ie.

²² Ina ibose ata mere ro idaibo tanaro osioidiro-ri pua orio tuba tagara kepuru to karate, mabu edi kepuru ro modobo pua, tuba nou boroboro koi ato, edi kepuru ro aise kerepepea ie, ina tuba tima moro to karaseduti ie. Orio tuba orio kepuru to kiratuti ie.'

Iesu Iu urubia komidiro saiki Abera naramu e

²³ Iesu komidiro saiki ato goroho woiti iopu pari abato, nou kowasoro urubia mutu. Nou iato na-goroho ina nou kowasoro urubia ro se gidoho-rimo woiti iopu, na-giakukuti-rimo taie iato aise giho-rimo. (Woiti iopu araiso sosoro ie.)

²⁴ Neio edi tanaro nou gisioidiro-rimo Parasi urubia ro na-giwia-rimo taie Iesu aboto aise

gou-rimo neio ro iato garatodai-rimo nou ibo, 'Abora saiki imese ota iopu kidoho sabi ie! Mabu boira oro kowasoro urubia ro komidiro saiki sabi na-esebea-dumo?'

²⁵⁻²⁶ Nou ro neio iato gemowameai, 'Nio ro a-wioputiti-mo ra Deibidi etu na tanaro gisioihiro? Tagara tau ato Abiata na-gomidiro Godi ra urubia ra turituri rubi nou ro na-iaurititi, Deibidi auna sogoi ro gowati Godi edi tarena parai moto ro nou neito nato godoro. Taie nou ro dokou ioudo na-gimidai-ro nou etio mutu gou neio mutu atu se giho-rimo. Iedi dokou ro na-giaremuti-rimo Godi sapuwo to giaremuti-rimo imese tarena ia ie.'

Kaupoti Iesu ro a-gutura ibo, 'Mose edi sabi patu ro na-giaiwai-ro ibo aro urubia ra Godi ra turituri dubu dokou kiaremuti ato tarena parai moto ato io Godi ra urubia ra turituri dubu neio kawakawa ro kiho ie iedi dokou ro.'

²⁷ Nou ro ina iato gutura Parasi urubia aboto, 'Komidiro saiki Godi ro gedea urubia kiwarebai aboto, ibo pua Godi ro urubia kisioidiro komidiro saiki sapuwo to.

²⁸ Mabu mo Imese Urubia Kiauri Dubu e, mo komidiro saiki abera naramu e.'

3

¹ Iesu ata komidiro saiki ato na-gou karadabu moto to, tu karawia dubu iato gomidiro.

² Iedi moto ro neito Parasi urubia ta-gou-rimo iato ibose to gorowomidiro, neio ubi ie Iesu iaui ri nou ro etou tanaro ama-isioidiro-ri. Neio ubi ie nou iato ata sabi ata esebea ri taie nou nato asotai rie koto aboto nato owou rie, ina neio ro

nou ri gemaipirio-rimo aupise iedi dubu ro komidiro saiki ato meana nama-owai-ri.

³ Taie Iesu ro na-gowea iedi tu karawia dubu ro nou aboto iato gutura ibo, 'Oro dotobowa nimo sosoro gabo ato!'

⁴ Iesu na-gerewesegerai neio aboto nou ro nato gutura ibo, 'Nimo sabi ro beda sosoro aro komidiro saiki sapuwo to, meana isioidiro ri ra o ubauba isioidiro ri ra? Urubia keremiro imowame ri ra o iopiauti ri ra, a?'

Iesu ro iedi karatodai oweri ro na-gaiwai neio aboto neio ro kemowameai modobo pua, imese akau aise goi-rimo.

⁵ Iesu auna serawo goi neio idaibo sosoro na-giauri, ina neio akau sapuwo to nou mibo ro gorobai.

Taie Iesu ro nato gutura iedi tu karawia dubu nou aboto, 'Oro tu dotuturai-ro!'

Taie iedi dubu ro nou tu iato gotuturai-ro, edi kotuturai na-gotuturai-ro nou tu imese meana aise goi.

⁶ Taie Parasi urubia ro na-gowea-rimo Iesu beda tanaro gosioiro neio edi moto ro aise gemeserai-rimo imese gosuruwo-rimo. Taie neio oweri iato giworohuti-rimo eputa dubu Herodi edi kobodoro urubia neio mutu Iesu kopia sapuwo to.

Auna dubu patu ro garadabuti Iesu aboto

⁷⁻⁸ Iesu kowasoro urubia mutu neio a-giodori Gariri obo paruo bara to. Urubia ro na-girowidiro-rimo Iesu beda tanaro gisioiro urubia meana na-giwaititi, mea se na-itamudiroiti, auna dubu patu nato

garapusia-ro Gariri duriomoro rido ibose Iudia rido Ierusarema rido. Nou kowasoro urubia mutu beda moro to giodori iodio urubia ro neio ibose to giodori nou aboto. Arua urubia ta-gou-rimo muso moro rido Idumia duriomoro rido ibose Iodeni sapuwo rido ta-garadabuti-rimo. Taia ra Sidoni ra kakate ato na-iamo edi sabowa sirio ro neio ibose ti-garadabuti-rimo, urubia sirio imese dubu patu ia ie. Nedi auna dubu patu ro nou ro gararasiouti iato Gariri obo paruo bara to.

⁹⁻¹⁰ Iesu ro temeteme urubia sirio meana na-giwaititi arua temeteme urubia ro odio dubu patu ro aise giwatatuti-rimo Iesu kowaseidiro sapuwo to neio temeteme nato oroporewado rie.

Taie nou ro nato gutura nou kowasoro urubia aboto pe emamodorai ri obo to mabu nou modobo pua neio ro kemohutauti aboto.

¹¹ Amia rubi ubauba urio ro giworohuti-rimo, ubauba urio ro nagi-owea-ri Iesu edi dubu ro goto ato aise keteamoidiro ie taie iato iamose gi-uturari, 'Oro Godi mere ie!'

¹² Ina Iesu ro auna se itomudiro titi erere ubauba urio ibo, 'Mo oro ro owapotai ate iamose to!'

Iesu ro 12 urubia giaubai

¹³ Iesu imese gidiai podo duriomoro to ina nou ro beda urubia ubi gimedeana nou ro oweria iato gemeiriai-ro neio idiai ri nou aboto. Taie iedi urubia ro umoro na-goi-rimo neio imese gidiai-rimo nou aboto.

¹⁴ Iesu ro idaibo sosoro giaubai 12 dubu, Nou Kitiodorai Urubia to giapoi. Neio nou ro nou ri

giaubai nou mutu atu se iroho ri, ibose neio itioduti ri arua duriomoro to nou sapuwo to mea oweru urubia imowauti ri,

¹⁵ ibose kawakawa urubia aboudo ubauba urio imabodoidiro ri.

¹⁶ Nedi urubia ro na-girumai nou ro neio masiro ie: Saimoni, ata masiro Pita Iesu ro gomia,

¹⁷ Iemisi ra Ioane ra, neitiro Sebedi mere teibo ie, neitiro ata masiro Iesu ro gimia-ma Boanegisi, Iu urubia oweru to owamo ibo 'Masawe dubu teibo ie,'

¹⁸ Enduru, Piripi, Batoromiu, Mataio, Tomasi, ata Iemisi nou Arapisi mere ie, Tadiasi, ata Saimoni nou Roma urubia mutu serawo werereauri-mo,

¹⁹ Iudasi nou Kerioti sabowa dubu e Iesu edi na ro gapoi nasa rubi aboto.

Arua urubia ibo geremowauti-rimo Iesu Satani ro oworohuti

²⁰ Iesu imese gorowameai nou korobuti moto to Kapeniama sabowa ato. Nou beda tau ato gorowameai-ro sirio urubia nou aboto nato garadabuti-rimo. Iesu nou kowasoro urubia mutu edi tau ro nato neio kiho modobo pua mabu dubu patu auna ia se gararasiouti.

²¹ Taie Iesu simara urubia ro edi oweru ro na-girowai-rimo nou sapuwo to, neio nato giodori nou orobai ri mabu urubia ro timatima oweru garo-rimo nou sapuwo to ibo 'Iesu nou kawakawa ta-goi.'

²² Ina Mose sabi kitamudiro urubia Ierusarema rudo na-giodori-ro Iesu aboto neio ro ata oweru iato garo-rimo nou sapuwo to ibo,

‘Iesu Satani ro oworohuti, nedi korosa ro nou ro ubauba urio neito imabodoidiro.’

²³ Iesu ro edi owera ro na-girowai taie urubia sirio nou ro aise gimaidodorai nou aboto imese gou-rimo. Taie Iesu ro totomu maumo mutu nou ro nato gimowauti. Nou ro ibo, ‘Satani ro modobo ra simara sowake urio kimabodorai aboto?’

²⁴ Kaupoti duriomoro urubia na-orowomidiro boso nato na-eremede-a-dumo iedio tau ro nato neio atu moro ato orowomidiro-ri pua, korohoduti ie.

²⁵ Ibose kaupoti moto urubia neio nakara se karado ato ibose korohoduti ie neio, atu moto ato atu se orowomidiro-ri pua.

²⁶ Ina Satani nou simara sowake urio mutu karado ato nou ro kiwaboi tanaro iato koko aise koi ie.

²⁷ Urubia dubu nou ubi ie kodoro aboto ata pupuwo dubu moto to namabu piro to ioudo imade ri, keba se modobo ie nou ro moto abera kemotohiti aboto, iato beda namabu ro iamo moto goro ato nou ro nato kiwosuwoduti ie. Mo ro Satani sowake urio idaibo sosoro to nimabodoidiro-titi.

²⁸ Oro mo ro abora imese owera nemowauti ina neio aise amadimo-ororosioidiro-ri. Ata mere ata nou ro ubauba tanaro na-isioidiro ibose Godi masiro ubauba na-owaititi nou edi ubauba ro Godi ro modobo ie kiatopeamuti.

²⁹ Kaupoti ata mere ata ro Tarena Urio masiro ubauba na-owaititi iedi mere ro nou ubauba kiatopeamuti gabo tato ie, iedi ubauba ro nou abato aise ama-owamotiti-ri.’

³⁰ Iesu ro nedi owera ro noudo gimowauti mabu neio ro Tarena Urio ubauba

gowaititi-rimo neio ro na-garo-rimo ibo Iesu nou Satani ro oworohuti.

³¹ Iedi oweri ro karo nou ro na-goporeai iato nou simara urubia ro gorowateai-rimo, nou mamu niramio mutu neio ro gou-rimo nou aboto.

³² Amia urubia ro gemowapotai-rimo Iesu ibo, 'Oro mamu niramio mutu ta-wou-rimo oro owea ri.'

Ina Iesu ro ibo gutura edi urubia sirio ro na-gorowomidiro nou gomo ato,

³³ 'Mo mamu niramio mutu boira?'

³⁴ Ina nou na-giraroweauti nou gomo ato edi urubia ro na-gorowomidiro nou ro ibo, 'Mo mamu niramio mutu nio nou se ie.

³⁵ Beda urubia ro na-isioidiro-titi-dumo Godi ubi tanaro io neio mo niramio ie, medamio ie, mamio ie.'

4

Erere goto sapuwo to nou totomu e

¹ Iesu ata tau ato Gariri obo paruo bara ato gitamudiro ina auna ia dubu patu ro nou nato gemosopa-rimo. Taie nou pe to aise gorora imese gabu egea mere se, urubia sirio koriri ato na-gorowomititi taie nou pe ato na-gomi ioudo gitamudiro-ro.

² Nou ro sirio totomu maumo mutu neio neito gitamudiro mea umoro kimidai sapuwo to. Nou ro iato gutura neio aboto ibo,

³ 'Nio neito ma-dirowidiro-rimo mo aboto. Ata tau ata pari kisioidiro dubu pakea ta-gieba keba se, nou ina iato gaimai ota iopu mutu pari ato iheruti ri mea mino to kisuruwo aboto.

⁴ Ota iopu iedi dubu ro na-giheruti, arua erehe moro ato gororobouti-rimo, idaibo arua iopu gabo ato gararemuti-rimo. Gabo ato na-gararemuti-rimo iedi ota iopu ro iato pawa ro giroruwo-ro neio ro giho-rimo,

⁵ ina arua ota iopu nou ro na-giheruti nadi goto ato gararemuti-rimo. Iedi ota iopu ro mea mino to gosuruwo-rimo keba se,

⁶ ina iato saiki korosa ro na-giwia neio puara aise gitemeiriai-rimo. Taie iato saiki korosa ri aise gorowaburai-rimo, mabu neio sipi mea mino to iwodoro pua mabu mea goto ohu ato kainai ie ina nadi maumo ato gowamo.

⁷ Ina arua ota iopu edi na giheruti ununu ota sere beda moro ato gorowotoi atu se gorowioro-rimo, iedi meamea ota ro ununu ota ro gimohiawado-rimo ina iedi ota ro neido meamea iopu iasesuti pua.

⁸ Kaupoti sipu tato edi na gararemuti-rimo mea goto ato neio ro gisuruwo-rimo mea se, arua ota rido iopu sipu tato se gisuwoduti-rimo, arua ota rido sirio se gisuwoduti-rimo, ina arua ota rido imese sirio ia se gisuwoduti-rimo.'

⁹ Iesu ro owera neito gopai, 'Etu ra mo owera modobo ato kirowidiro aboto nou mo gare se ba-memedea-ro!'

Mabu boira Iesu ro urubia totomu na-itomutiti

¹⁰ Iesu nou urubia mutu nakara se geremeserai taie nou edi 12 urubia ro arua rubi mutu neio ro nato gemodowa-rimo nou ibo, 'Mabu boira oro ro totomu na-itomuti?'

¹¹ Iesu ro neio neito gimowameai, 'Godi ro kiwaboi tanaro keba se piro se ta-gowamo mo ro

a-niwawea nio ia aboto. Arua rubi aboto mo ro totomu se korowauti ie, kaupoti maumo neio aboto iwapotai-ri pua.

¹² Mo ro nou mabu ato nisioirotiti idaibo Aisaia Godi ipusu owera dubu keba se nou ro ta-gisioiroti owera ibo *Neio ro kowea ie kaupoti neio ro beda kowea ra. Neio ro kirowidiro ie kirowidiro ie umoro beda koi ra. Etu umoro ra neio ro kimidai ato taie neio kerewesegerai ie Godi aboto, neio edi ubauba ro nou ro nato kimatopeamuti ie.*

Totomu erere goto sapuwo to Iesu ro maumo nou gowawea

¹³ Iesu ro iato gutura nou kowasoro urubia aboto, 'Iedi totomu ro mo ro na-nimowauti nio ro mea se imidai pua ra? Ina arua totomu nama-imowauti-ri nio ro maumo beda sosoro amadimi-imade-ri?

¹⁴ Ota iopu kiheruti dubu nou idaibo ie Godi edi mea owera ro edi na urubia ro na-iaiwodumo neio ie.

¹⁵ Arua ota iopu a-gararemuti-rimo gabo ato neio idaibo urubia ie dorogora se kirowai ie Godi edi mea owera ro ina Satani kou ato neio aboudo nou ro aise kipouti ie.

¹⁶ Arua ota iopu neio nadi goto ato gararemuti-rimo neio idaibo urubia ie, kirowai ie Godi edi mea owera ro keba se kamade mutu kimidai ie,

¹⁷ ina Godi edi mea owera ro sipi kiwodoro modobo pua edi urubia ro neio aboto, tuturu to beda korowotoi ra. Arua ubauba kou ato neio aboto mabu neio edi mea owera ro ta-gimidai-rimo, edi tau ro nato neio ubi tato aise koi ie.

¹⁸ Ina arua ota iopu neio a-gararemuti-rimo ununu ota sere beda moro ato gorowotoi neio idaibo urubia ie kirowai ie Godi edi owera ro mea mino to

¹⁹ kaupoti neio abato kiamo ie kimaragoidiro siriosirio, kimaragoidiro mani aboto auna se kiamo ie, ibose neio ubi ie imese sirio namabu patu kiworohuti aboto. Taie edi kimaragoidiro patu ro iedi mea owera ro kiroromai aboudo neio ro kiwasiouti ie, ata ota iopu ata osuruwo-ri pua ioudo.

²⁰ Ina arua ota iopu mea goto ato gararemuti-rimo neio idaibo urubia ie kirorowai ie edi mea owera ro taie neio ro mea mino to aise kimibiria ie. Iedi urubia ro Godi ubi tanaro mea se neio ro emesioidiro-dumo, ina neio aboudo Godi ro mea wisa imade, arua aboudo egea mere se ie, arua aboudo auna se ie, ina arua aboudo auna ia se ie.'

Tanaro paeapaea amadimo-oi-ri

²¹ Iesu ro iato gutura ibo, 'Oro erempa kowateai ato oro ro ibi gugu maumo to kowopirowa ra? E e ibo pua. Oro ro ohu ato kakokai ie kenene rudo,

²² ina idaibo sosoro ie imese beda mutu tanaro patu ra urubia ro kiauri tato neio paeapaea amadimo-oi-ri. Ina beda nakomu ra urubia ro na-giatimuti-rimo ibose to amadimi-iwatatetuti-ri.

²³ Etu ra mo owera modobo ato kirowidiro aboto nou mo gare se ba-memedea-ro.

²⁴ Nio modobo ie nedi tau ro nato mea se kirowai mo ro beda owera naro. Nio ro urubia

beda sosoro to iworohuti-dumo nio neio ro ibose amadimi-iworohuti-ri.

²⁵ Etio ro gimidai-rimo auna umoro Godi mea oweru sapuwo to neio aboto amia umoro ohu rudo ama-imotomotiti-ri. Etio ro gimidai-rimo egea mere se umoro Godi mea oweru sapuwo to neio aboudo edio umoro kainakaina ro ama-iwatate-ri.'

Totomu ota iopu nakara se kiroromai sapuwo to

²⁶ Iesu ina iato gutura nou kowasoro urubia aboto ibo, 'Godi ro kiwaboi tanaro idaibo sosoro ie, ata dubu ro ota iopu kibouti ato iedi ota iopu ro neio nakara se awawo aise koi ie.

²⁷ Neio awawo koi ato saiki ato kiroromai ie duwo ato kiroromai ie ibo kiroromai ie. Urubia dubu norou korobu ato ina kowaroho na-werebua iedi ota iopu ro neio nakara se kiroromai ie. Nou umoro oi-ri pua ibo nedi ota iopu ro beda sosoro iroromai-dumo nou ata umoro tato ie.

²⁸ Kau keba se keremapusuti ie, ina iato upa ro isuwoduti-dumo iato iopu iaremuti-dumo.

²⁹ Iopu awawo na-woi-dumo taie gumuni ato pari kibouti dubu ro iato kidabuti ie.'

Totomu masitadi ota iopu sapuwo to ie

³⁰ Iesu ro ina nou kowasoro urubia iato gimowauti, 'Mo ro nio totomu ina anama-imowauti-ri Godi ro kiwaboi tanaro beda sosoro ra.

³¹ Nou masitadi iopu sosoro ie oro ro karo ato goto ato iedi iopu kainai ro auna pua, nou imese kaina ia ie. (Masitadi iopu mirie iopu sosoro ie.) Arua ota iopu awawo ie, kaupoti nedi ota iopu ro kaina ia ie.

³² Ibose nou oro ro goto ato karo ato iedi ota ro na-wororomai nou auna ia aise koi ie ina arua ota na-worowotoi pari ato neio nou ro sopu to kiauri ie, iedi ota ro gebari ia ie. Nou atemo na-iheruti ito tumu pawa iato kou e neio toto iato keremari ie iedi ota ro nou atemo ato.'

³³ Iesu ro Godi edi mea owera ro sirio tau idaibo sosoro totomu to itomutititi womu tato neio ro umoro simara modobo ato gimade-rimo.

³⁴ Nou ro urubia sirio na-imowautiti nou ro totomu to se imowautititi, kaupoti nou kowasoro rubi mutu na-imidirotiti nakara moro ato nou ro totomu maumo mea mino to iato imabutititi neio aboto.

Iesu ro surama ra bukopu ra a-giadibiai-ma

³⁵ Iedi adimo duwoduwo ro nato Iesu ro iato gutura nou kowasoro urubia aboto, 'Nimo miabu-rimo Gariri obo paruo sapuwo to.'

³⁶ Taie auna topira neio ro aise gemeserai-rimo Iesu keba se gorora pe to, nou kowasoro rubi kororuti taie neio imese giabu-rimo obo paruo sapuwo to. Arua pe neibi pe mutu atu se gorowabu-rimo.

³⁷ Neio na-gorowabu-rimo turi damo ato auna ia surama ro iato giwia taie bukopu nato giriribua-rimo pe sapisapuwo rido gorowiti-rimo obo ta-giritomuai-ro neio aupise kimarumo.

³⁸ Iesu pira ato geremeidiro norou ia gorobu wapo ato imese moro to gaimawado. Nou kowasoro urubia aborabora se giraroweauti-rimo, neio ro ibo, 'Nimo aupise ie kimarumo!'

Taie neio aise gorowadoro-rimo Iesu aboto amutia ri, 'Auna dubu oro deribua nimo aupise korowaburai oro kimaragoidiro tato ra nimo aboto?'

³⁹ Iesu ro na-girowai neio edi oweru ro nou oweru kaupoti ato aise gerebua-ro surama ra bukupu ra aboto nou ro iato gutura, 'Surama deremasiai! Bukupu deremasiai!'

Taie surama ra bukupu ra aise garadibiai-rido obo paruo ato gasio imese gereredeua.

⁴⁰ Iesu ina iato gerewesegerai nou kowasoro urubia aboto, nou ro ibo, 'Nio otou tere ro iwati? Nio kimibiria iamo pua ra?'

⁴¹ Taie neio auna ia tere ro giwati nakara se iato geremowagomea-rimo ibo, 'E, nedi dubu ro beda dubu ra? Nou edi oweru ro surama ra bukupu ra aise irorowai-do!'

5

Urubia dubu ubauba urio ro goworohuti-rimo

¹ Iesu nou kowasoro rubi mutu na-giabu-rimo Gerasa urubia iato gorowomidiro obo paruo sapuwo ato,

² neio na-gorowateai-rimo Iesu nou keba se gerepeduai pe rido. Nou edi tau ato na-gerepeduai ata dubu pamo rubi edi na moro ato na-iroboti ioudo gosuruo-ro,

³⁻⁴ nou iato imidiroiti sirio tau to. Nedi dubu ro ibo pua nakara se koroho nou ubauba urio sirio ro woworohuti-mo. Urubia ro nagi-irimohiai-ri egea se gi-irimemotohiti-ri seni to nou ro aise gi-asiouti-ri idaibo tanaro nou

isioidirotiti. Ina neio ro modobo pua nou ina kemotohiti aboto.

⁵ Nou dorogora se irohotiti podo gawagogo ato pamo rubi bobo abato iamo mutu susura nadi nou durupi neito irototoutititi.

⁶ Iesu muso ato gou-ro iedi dubu nou ro iato gowea taie nou aise girario-ro Iesu aboto kauhio to kirimusubua

⁷⁻⁸ taie Iesu ro nato gutura nou aboto, 'Oro edi ubauba urio ro na-womidiro iato oro dosuruwo-ro edi dubu nou aboudo!'

Nedi dubu ro auna ia iamo owera nou gutura, nou ro ibo, 'Godi ohu ato na-omidiro-die Iesu oro nou mere ie! Oro etou tanaro amadi-osioidiro-ri mo aboto? Oro Godi masiro dapoi iato ba-deremowotouti mo oro ro ubauba owai-ri pua!'

⁹ Ina Iesu ro ibo, 'Oro masiro etu ra?'

'Sirio ie. Mabu mo kaupoti pua, nimo sirio ie.'

¹⁰ Nedi dubu ro ina ina Iesu aise gemediawado, 'Nimo imeriai ate nedi duriomoro ro neido!'

¹¹ Taie edi duriomoro nato podo gawagogo ato giro sirio ohona iato geremosora-rimo.

¹² Edi ubauba urio sirio ro neio ro ibo, 'Nimo ito dimeriai-ro edi giro sirio ro neio aboto iato nama-irowomidiro-ri.'

¹³ Taie Iesu ro na-girowai neio beda owera garo-rimo nou aise garadodorai.

Edi ubauba urio sirio ro neido na-gou-rimo edi dubu ro aise gemeserai-rimo, giro niro turi to aise gorowateauti-rimo, taie edi giro sirio ro neio iato kawakawa ro aise girobai, neio podo

gawagogo rido atu se gorowodori-rimo obo to iato neio obo ro aise giopia.

¹⁴ Giro kimowotoi urubia ta-gorowotoi kaupoti neio a-gorowadau awawo sabowa to taie urubia neio ro iato gimowauti-rimo etou tanaro gororosioi-di-ro-rimo giro sapuwo to. Taie urubia ro na-girorowai-rimo edi owera ro neio imese goroho-rimo simara idomari to iauri ri.

¹⁵ Ina edi dubu ro ubauba urio sirio na-gemeserai-rimo urubia sirio ro giauri-rimo nedi dubu ro nou a-gomidi-ro Iesu abato nou obotama ta-giroiti nou mea se gomidi-ro. Urubia ibose neio tere ro giwati.

¹⁶ Ina Iesu iedi tanaro ro na-gisioi-di-ro arua urubia ta-gorowomidi-ro iato neio ro ta-giauri-rimo. Taie iedi urubia ro neio ro arua urubia iato gimowauti-rimo iedi tanaro na-gororosioi-di-ro-rimo iedi dubu ro nou sapuwo to ina ibose giro sapuwo to.

¹⁷ Taie urubia ro Iesu iato gemowapotai-rimo, 'Oro modobo ie nimo edi duriomoro ro kemeserai aboto.'

¹⁸ Iesu ro na-girowai edi owera ro nou pe to gorora iato nedi dubu ro ubauba urio sirio ro na-gemeserai-rimo nou ro girario-ro nou aboto. Nou ubi ie aradabuai ri nou mutu ou ri.

¹⁹ Kaupoti Iesu ro a-gutura ibo, 'Oro ba-dorowameai simara urubia aboto, oro ro ba-dimowauti Abera Naramu ro beda tanaro osioi-di-ro oro aboto ibose nou ro nirimagare ta-waiwai oro aboto.' Iedi owera nou mutu gemeiriai edi dubu ro.

²⁰ Taie edi dubu ro iato aise goroho 10 sabowa to atu moro ato na-giamo, urubia sirio nou ro

iato gimowauti Iesu ro beda tanaro gosioidiro nou sapuwo to. Taie urubia ro na-girowidiro-rimo nedi oweru ro neio imese auna ia kimaragoidiro ro giopia.

Iesu ro meana giwai-ma pamo besere ata temeteme orobo mutu

²¹ Iesu obo paruo sapuwo rido na-gorowameai-ro edi tau ato na-gorowateai-ro obo paruo bara to, nou auna ia topira ro nato gemosopa-rimo, nou gomo ato urubia se gorowotoi.

²² Taie edi tau ro nato Iu urubia karadabu moto kiauri dubu masiro Iairo imese gou-ro iedi moro ro neito. Iairo ro Iesu na-gowea nou aise girosiriti nou sairo mabu ato taie

²³ nou ro Iesu iato gemagege ou ri nou besere meana owai ri. Nou ro inaina aise garowado ibo, 'Mo besere buro aupise karaburai, nou auna besere ie, 12 kisimisi ie. Oro modobo ie hio to kou meana owai ri. Oro ro ba-dowasomai mo ubi ie nou temeteme ro kemeserai.'

²⁴ Iesu ro edi oweru na-girowai taie nou imese gou Iairo mutu, urubia sirio ro ibose to gorobodoro-rimo saro rido. Iedi urubia sirio ro imese dubu patu ia ie, neio sapuwo to a-gororohoiouti-rimo Iesu gomo ato.

²⁵ Nedi dubu patu maumo ro nato ata temeteme orobo ta-garadabuai nou durupi rido auna ia karima ro wororuwotiti 12 kisimisi to. Nou auna ia temeteme ro owatititi.

²⁶ Nou dokota sirio neio ro meana kowai sapuwo to ta-wisioidirotiti-mo woko nou durupi ato, kaupoti modobo pua neio ro meana kowai,

ibose auna ia mani wiheretiti temeteme wisa
sapuwo to na-iaiwoiti womu tato mani
ti-giporeai. Kaupoti nou meana owai pua neio ro
odio temeteme ro nou durupi ato auna aise goi.

27-28 Iedi orobo ro nou ro na-girowai ibo Iesu
ro temeteme urubia meana tiwaititi, taie nou
neio dubu patu maumo to aise godoro atu se
imese gou-rimo Iairo edi moto ro neito. Kaupoti
edi orobo ro neido na-gou nou kimaragoidiro to
ibo, 'Mo ro Iesu obotama nama-owasomai-ri mo
umoro ie mo karima kororuwo
ama-eremasiai-ri.' Iedi orobo ro neido na-gou
nou ro nato gowasomai Iesu edi obotama ro

29 nou iato a-geremasibai ibo, 'Karima mo
aboudo ta-waradibiai.'

30 Iedi tau ato meana na-goi Iesu nou ibose
ta-geremasibai nou pupuwo korosa
na-gosuruwo-ro nou aboudo taie nou iato aise
gotobowa na-giraroweauti urubia iato
gimodowa, 'Mo beda mere ro nowasomai-die?'

31 Ina nou kowasoro urubia ro ibo, 'Urubia
sirio ia ie aise ororohoiouti-dumo. Nimo etou ri
nimodowa-die?'

32 Iesu inaina aise giraroweauti urubia
na-giauri nou ubi ie umoro koi etu ro owasomai.

33 Iedi orobo ro gowasomai nou umoro ta-goi
beda tanaro gororosioiido nou abato. Taie nou
komuguguro komuguguro gou-ro, Iesu sairo
mabu ato iato aise gorodiriti, taie Iesu nou ro
owera iato gemowauti beda sosoro tanaro
gororosioiido nou abato.

34 Ina Iesu ro ibo iedi orobo ro nou aboto,
'Nirimagare oro abora meana ta-woi mabu oro

kimibiria auna ie, oro mea kamade maumo ato ama-omidi-ro sabowa ato.'

³⁵ Iesu ro iedi oweru ro nou garo iedi orobo nou aboto iato Iairo moto rido arua dubu na-gorowarario-rimo Iairo aboto. Neio ro iato gutura-rimo, 'Iairo oro besere buro eremiro pua, pamo ie. Iedi kitamudi-ro dubu ro oro ro aise owou ate, mabu oro ro nama-owou-ri nou ama-orowagumaidi-ro, momidi-ro nou.'

³⁶ Kaupoti Iesu ro na-girowai edi dubu peteibi ro beda oweru garo-birimo nou ro imaragoidi-ro pua neibi oweru. Taie nou iato gutura Iairo aboto 'Oro tere na ie kimibiria kaupoti se dowerohuti.'

³⁷ Taie Iesu ro iato giaubai-bi Pita ie, naramu ra neama ra Iemisi ra Ioane ra Iairo ia mutu ou ri nou moto to.

³⁸ Neibi moto goro to na-godoro-birimo urubia sirio se giwia-birimo neio idobi diamo ro garo.

³⁹ Taie Iesu ro ibo, 'Nio etou na mabu ato iroto-dumo idobi auna diamo na-isioidi-ro-dumo? Iedi besere ro pamo pua nou norou orobu.'

⁴⁰ Ina edi urubia na-gorowotoi neio ro gaga to gemasio-rimo.

Iesu ro ibo, 'Nio na-orowomidi-ro nedi moto ro nato abora demeserai-rimo dosuruwo-mo!'

Taie iedi urubia ro na-gosuruwo-rimo Iesu iato godoro iedi pamo besere bato gorobu, taie nou ro ibo, 'Pita, Iemisi, Ioane nibi dou-birimo nou mamu ra abera ra mutu nibi nakara se dodoro-birimo.'

Taie neibi na-godoro-birimo besere bato gorobu

⁴¹ Iesu ro nou tu rido iato gorobai, nou ro ibo iedi besere ro nou aboto 'Tarita kouma!' (Ibo owamo 'Besere kainai deribua-ro!')

⁴² Taie iedi tau ato Iesu owera na-geremasiai iedi besere ro aise geribua-ro taie imese goroho iedi ibi gugu ro nato. Taie iedi na peteibi ro Pita, Iemisi, Ioane, Iairo orobo mutu neibi iato kimaragoidiro ro giopia-ibi.

⁴³ Iesu iato gerewesegerai neibi aboto neibi koko owera iato gimia-ibi, 'Nedi owera ro nibi ro orowauti ate ba-dorobidiro-bimo nakara se. Mamu ra abera ra nitiro besere kainai ohona domia-do.'

6

Iesu kororomai sabowa to gorowameai

¹ Taie Iesu Iairo sabowa rido na-gou-ro simara sabowa to imese gorowameai. Nou nakara se ou pua iedi tau ro nato nou simara kowasoro rubi mutu gou.

² Neio edi tau ato na-gorowateai-rimo iato komidiro saiki ro nato giwia Iesu iato gitamudiro neio edi karadabu moto ro nato. Urubia sirio ro nou owera na-gemewidiro-rimo neio kimaragoidiro ro giopia nou kitamudiro owera mino beda sosoro ra. Neio ro ibo, 'Iedi dubu ro nou idaibo sosoro korosa kitamudiro boido gowai? Nou muro boido gowai? Nou pupuwo korosa tanaro kisoidiro boido gowai?'

³ Nou beda gebari pere ra, moto keremari woko isioidiro titi. Nou Maria ro goroto ina nou niramio ie Iemisi Iosepa Iudasi daro Saimoni, ibose nou medamio mutu e torowomidiro nato.'

Iedi urubia ro neio ro nou
emaidodorowadotiti pua nou neio ro aise
ohoiotiti-mo.

⁴ Taie Iesu nato gutura ibo 'Godi ipusu oweru
dubu nou arua moro to koroho ato iato neio ro
nou mea se koworohuti ie, kaupoti nou simara
moro to korowameai ato neio ro mea se
oworohuti-ri pua.'

⁵ Ina Iesu simara sabowa ato awawo korosa
tanaro isioidiroiti pua, modobo pua nou ro iato
kisioidiro. Nou ro sipu tato temeteme urubia
nou ro meana neio giwai.

⁶ Iedi urubia ro kimibiria tato na-giauri nou
kimaragoidiro ro gopia.

*Iesu ro 12 kowasoro urubia gitioduti duriomoro
gabogabo to*

Taie nou imese gou arua sabowa to nou ro
urubia iato gitamudiro.

⁷⁻⁸ Iedi tau ro nato nou 12 kowasoro urubia
neio mutu atu se goroho-rimo. Taie nou ro
ubauba urio kimabodoidiro urubia aboudo
pupuwo korosa oweru iato gimia, 'Nio mo ro
anama-itioduti-ri netewa netewa se duriomoro
gabogabo to. Nio kou ato ata nakomu ata iwou
ate nio ibose ba-doroho-mo tu kawakawa. Nio
gonopu se ba-dirobidiro-mo, dokou, mani, keta
popo iwou ate,

⁹ tamaka ba-diroiti-mo, nio ro beda obotama
iroidiro-dumo nou mutu se ba-dou-mo senisi
namabu iwou ate.

¹⁰ Ata sabowa to korowateai ato beda moto
rido imaidodorai-diomo nio iato se
gi-orowomidiro-ri iedi moto ro nato. Modobo
pua iedi moto ro nio ro kemeserai ina ata moto

to kerepeduai ohona iosora ri, modobo ie iedi moto kaupoti ro nio nato se korowomidiro.

¹¹ Ina nio ata sabowa rido na-ibeiyuti-diomo kiramairiai tato, ibose nio owera aboto gare iedea tato iedi urubia ro neio ro, iedi sabowa ro nio ro aise gidime-emeserai-ri. Iedi sabowa ro nio ro kemeserai ato sairo panese aise gidi-imahuditi-ri neio umoro koi sapuwo to ibo neio abato towamo ubauba.'

¹² Taie nou kowasoro urubia iato imese gororoburutai-rimo duriomoro gabogabo iedi mea owera ro nou obodorouti ri. Taie beda moro to goroho-rimo neio ro iato gimowauti-rimo 'Ubauba rido ba-derewesegerai-mo Godi aboto.'

¹³ Ibose nou edi kowasoro urubia ro neio iedi pupuwo korosa mutu na-gitiodorai neio ro ubauba urio urubia bato na-gorowomidiro aise gimabodoidiro-rimo. Neio ro ibose kimibiria mutu mea isi to temeteme urubia neito gimaseduti-rimo taie temeteme neio aboudo aise goroporewado-rimo.

Obo to kiwarumiauti dubu Ioane nou beda sosoro gopia-rimo

¹⁴⁻²⁹ Herodi nou eputa dubu e iato imidirotiti Gariri duriomoro nou ro iaurititi. Herodi Piripi naramu e, ata orobo masiro Herodiasii nou keba se Piripi ro gedea ina nou simara naramu ro gowasiri. Taie obo to kiwarumiauti dubu Ioane Herodi nou ro paea mata se emowapotaidirotiti ibo, 'Oro ubauba tanaro gosoidiro neama dubu orobo na-gowasiri, oro ro sabi gesebea.'

Iedi owera ro Herodias ro na-girowai nou ubauba to gereredea, Ioane nou ro ubauba masawe neito iaurititi. Herodias gabo ibo iosoratiti Ioane kopia aboto, kaupoti gabo owea pua mabu nou Herodi ro owasioutititi.

Ata tau Herodi owera iato gemeiriai nou boso urubia aboto Ioane orobai ri dibura to edea ri. Taie boso rubi ro edi owera ro na-girowai-rimo neio ro Ioane aise gemou-rimo taie korobai iato dibura to aise gibiria-rimo. Herodi ro nedi tanaro ro nou ri gosioidiro mabu nou ubi ie Herodias kamade kowai.

Herodi ro Ioane tere ta-ematititi, nou ubi tato ie nou kopia mabu nou umoro ie Ioane nou kerewaikerewai tanaro tato ie, nou tarena dubu e ina Ioane nou ro mea mino to oworohuti. Herodi ubi ie Ioane owera kemewidiro aboto kaupoti nou ro na-emewidiro titi siriosirio kimaragoidiro iaurititi.

Taie ibo imidiro titi-bimo ata tau Herodias ro mea tau nato gowea Herodi koroto tau ro gowamo taie nou ro urubia sirio iato gidabuti-ro kaupoti moro to nou duriomoro edi na urubia na-emeaurititi-mo, nou boso eputa urubia arua awawo rubi mutu. Taie nou ro iato gimowapotai ibo, 'Abora mo koroto saiki ie, mo soriomu namadime-emesioidiro-ri.'

Taie urubia kaupoti moro to ta-gorowoiriamuti-rimo ohona iato giho-rimo, taie iedi tau ro nato Herodias edi besere ro nato gou-ro omaro ri. Iedi dubu sirio ro na-gorowomdiro Herodi mutu neio ro ta-giauri-rimo nou komaro ginere beda sosoro gimesioidiro neio nou ro kamade aise giwai.

Taie iedi besere ro nou komaro na-goporeai Herodi ro nou aboto iato gutura ibo, 'Oro etou nakomu ro orowapotai-die mo ro aise anama-omia-ri. Mo ro edi duriomoro na-niauri oro ubi ato oro sapuwo anama-emaopea-ri mo ro.'

Taie iedi besere ro nou ro edi owera ro na-girowai nou imese girario mamu aboto, nou ro ibo, 'Aiau mo ro etou nakomu ri nama-utura-ri eputa dubu aboto?'

Nou mamu ro ibo, 'Oro ibo ba-dutura "Ioane eputa."

Nou ro edi owera ro na-girowai taie nou imese girario hio to eputa dubu aboto nou emowapotai ri. Nou na-gorowateai-ro nou ro ibo, 'Mo ubi ie oro ro Ioane eputa komia abora ba-demowia-ro kipura to neito ba-demowou-ro.'

Eputa dubu ro edi owera ro na-girowai nou eputa se geweisorowado nou kamade tato ta-goi, kaupoti nou ro beda owera gutura iedi besere ro nou aboto edi dubu sirio ro na-gorowomidiro soriomu abato neio ro ta-gemorowai-rimo ina nou modobo pua ubi tato koi, taie iedi besere ro nou owera gabo modobo eputa dubu aise garaidodorai, taie nou ro ata boso dubu imese gemeiriai dibura moto to, Ioane nou ro iato na-gowea komidiro moro ato iato giri se gomia wagoha aise garia. Taie edi eputa ro nou ro na-gowia kipura to imese gowameai-ro iato gaiwai iedi besere ro nou aboto ina nou ro gowarario mamu aboto.

Taie Ioane kowasoro rubi ro na-girowai-rimo ibo Ioane ta-waria-mo nou ududu durupi torobu, taie neio iato gou-rimo nou ududu

durupi bato gorobu neito, na-goumai-rimo taie imese gedea-rimo bobo to.

Herodi owera ta-giowai Iesu sapuwo to mabu nedi duriomoro nato Iesu masiro imese ta-gorobodorouti. Arua urubia ro nato gutura-rimo ibo, 'Iesu nou Ioane ie obo to edi dubu ro na-iwarumiautiti nou bobo rido ta-geribua-die io nou se ie nou.'

Ina arua urubia ro ibo, 'Iesu nou Eraia ie, Godi ata ipusu owera dubu e tagara tau ato na-imidirotiti.'

Ina arua urubia ro ibo, 'Nou Godi ipusu owera dubu e ipusu owera urubia beda sosoro gorowomidiro tagara tau ato.'

Herodi nou gare se iedeatiti neio edi owera to na-iremowagomeatiti-mo Iesu sapuwo to iato nou ro a-gutura ibo, 'Iedi obo to kiwarumiauti dubu ro Ioane nou mo owera to ta-garia-rimo ina nou bobo rido ta-geribua-die io nou se ie.'

Iesu ro auna topira gebari ohona to giwarebai

³⁰ Iesu kowasoro urubia na-gitiodorai neio ina ioudo na-gorowame-rimo nou aboto, nou owera iato gemowauti-rimo neio ro etou tanaro gisioidiro-rimo. Iedi owera ro neibi nouto na-geremowauti-birimo

³¹ iato urubia dubu patu nato garadabuti-rimo neibi aboto. Urubia arua kou korowameai neito gorowati-rimo kou korowameai mabu urubia imese sirio ia ie. Ina iedi urubia sirio ro na-giwia-birimo neibi ro mea tau owea pua ohona kiho aboto.

Taie Iesu nato gerewesegerai neibi aboto nou ro nato gimowapotai-bi, 'Dou-birimo, mo mutu

atu se mou-birimo urubia tato moro to sipere iato namabo-omidiro-ri.'

³² Taie neibi pe keremamodorai kiora imese giabu-birimo nakara moro to.

³³ Urubia sirio umoro ta-goi-rimo ibo neibi iedi moro ro neito ou-bimo. Taie neibi na-gasiriai-birimo urubia ibose sairo to ata gabo rido gou-rimo, taie neibi ido gorowateai-birimo iedi moro ro neito keba se iedi urubia ro neio ro gorowateai-rimo.

³⁴ Neibi iato na-gairio-birimo iedi urubia sirio ro Iesu nou kowasoro urubia mutu neibi gimasebidiro-ibirimo. Iedi urubia sirio ro sabowa gabogabo rido goroho-rimo.

Iesu na-giraroweauti nou auna ia nirimagare goi neio aboto mabu neio nou ro na-giwia idaibo ie sipisipi kimowotoi dubu tato ie dorogora se irohotiti-mo iedi urubia ro idaibo mino to goroho-rimo. Taie nou ro auna se iato gitamudiro.

³⁵ Iesu iedi kowasoro urubia ro iedi tau ro nato saiki egea mere se ta-gororumaidiro neio ro nato gutura-rimo nou aboto, 'Nedi moro ro neito na-nou-diebirimo nato urubia orowomidiro pua, sabowa tato moro ie. Saiki oriodoi

³⁶ nedi urubia ro modobo ie kitiodorai aboto neio modobo ie aupi sabowa na-irobu-die neito kitioduti ohona iato ba-mimade-mo mani to.'

³⁷ Taie Iesu ro neibi nato gimowameai-bi ibo, 'Nibi ro modobo ie nedi urubia ro ohona kimia.'

Ina kowasoro urubia ro ibo, 'Neio ohona kimemidai ato neibi ro idaibo auna mani keherai ie! Neibi idaibo sosoro mani pоторо ie neio ohona imemedede na!'

³⁸ Taie Iesu ro ina iato gimodowa-ibi, 'Nibi beda mutu dokou iwou-diebirimo? Dou-bimo iosora ri.'

Taie neibi imese gou-birimo na-giosora-birimo Iesu nato gemowapotai-birimo ibo, 'Neibi abato tiamo 5 dokou nakere teibo mutu.'

³⁹ Taie Iesu ro iato gimowameai-bi, 'Urubia dimowapotai-bimo gabogabo ato marapeputi-mo sugamoso ato morowomititi.'

⁴⁰ Taie, neio imese gorowomititi simara topira to, arua 50, arua 100.

⁴¹ Taie Iesu ro dokou ioudo na-gimidai-ro nakere teibo mutu taie nou toboro ohu to se gawota taie nou eso owera imese garo iedi dokou ra nakere ra neitiro sapuwo to. Dokou nou ro aise gisebuti ipiipi nakere ibose ti-gisebuti taie urubia ihona nou ro imese gaiiwo nou kowasoro urubia aboto. Taie neio ro na-gimade-rimo iato gimoworoho-rimo,

⁴² urubia sirio ro imese giho-rimo, neio na-giho-rimo womu tato ti-giamidimai.

⁴³ Taie neio kiho na-giporeai-rimo iedi mapapati ro na-gimesere-rimo kowasoro urubia ro 12 gatere to gimodiawado-rimo womu tato gatere sirio imese ti-giritomuti-rimo.

⁴⁴ Iedi urubia ro iato na-giho-rimo ohona auna topira gebari ie. Dubu se gioputi-rimo 5,000. Mamio merebusere mutu ioputi pua.

Iesu obo ato gou-ro

⁴⁵ Iesu ro nou kowasoro urubia iato gimowapotai pe to iabu ri ata sapuwo to sabowa masiro tararasoro Betesaida to. Iedi tau ro ohona kimio ta-goroporeai Iesu ro nato

gimowapotai-bi ibo 'Nibi dasiriai-bimo keba se, mo saro rido tinama-ou-ri.'

Taie Iesu iato aise geremeserai, urubia iato gitioduti neio simara sabowa to orowame ri taie

⁴⁶ iato nou imese gidiai podo duriomoro to, Godi mutu iato geremowauti-rido.

⁴⁷⁻⁴⁸ Adimo duwoduwo ato nou umoro ta-goi nedi na peteibi ro na-gasiriai-birimo ipi ato auna ia woko tosioidiro-diebirimo pe egea se gabiti-birimo gawia ro aise giwame-biro neibi modobo pua.

Omona pawa owera ato Iesu ro nato giwasoro-ibiro saro rido nou wisa na obo ato gou-ro neibi ro aupise nato gowea-birimo pe gomo ato na-gapere-ro

⁴⁹ nou neibi ro eibimai pua a-giwagogorai-birimo. Tere iamo iato giaiauti-birimo ibo, 'E, Obodai dubu tou-die!'

Neibi ro obodai dubu to gasoro-birimo eibimai pua,

⁵⁰ kaupoti nou owera to gorowapotai-ro neibi aboto ibo, 'Nibi tere na ie, nou mo ie, mo ata dubu pua.'

⁵¹ Nou pe to imese gorora neibi turituri ato imese gomi. Iedi korora na-gorora pe to iedi gawia gebari ro boito hatou gou aise garadibiai. Neibi ro na-gowea-birimo etou tanaro ro gororosoidiro neibi auna kimaragoidiro ro giopia-ibi imese gerereauri-birimo.

⁵² Keba se neibi ro iedi atu saiki ro nato ta-giauri-birimo 5 dokou nou ro beda sosoro mino to gisebuti ina beda sosoro to gorowatuti-rimo inaina. Nou ro etou tanaro

gisioidiro neibi ro maumo mea mino to owea pua ina neibi auna se gimaragoidiro-birimo gawia beda sosoro to garadibiai. Neibi kimaragoidiro patu imese timotimo ia se giamo modobo pua maumo mea se kowea.

⁵³ Neibi na-giabu-birimo Betesaida orobai pua aise giairio-birimo ata duriomoro muba towamo Genesareti to, iato neibi kererepeduti, pe neibi ro na-gemasaubo-birimo mea mino to,

⁵⁴ taie urubia ioudo na-gou-rimo neio ro nato gowea-rimo 'O nou Iesu e. A Iesu ta-wou-ro.'

⁵⁵ Neio perepere se gorowararioidiro-rimo erere sabowa to urubia imowapotaiddiro ri ibo Iesu ta-wou-ro. Taie iedi korowararioidiro ro na-gorowararioidiro-rimo ina ioudo egeaegea temeteme rubi mutu gorowame-rimo iato giworoho-rimo taratara mutu Iesu aboto nou ro meana iwaititi ri.

⁵⁶ Duriomoro gabogabo Iesu na-goroho temeteme urubia ibose ti-giworoho-rimo goto didiri to nou ro meana iwaititi ri ina arua urubia ro auna ia se gemagege-rimo ibo, 'Iesu modobo buro ra nimo namuturubi temeteme ro na-iwati oro obotama gare kawakawa kemowaseiddiro?'

Iedi temeteme urubia ro neio ro obotama iato gemowaseiddiro-rimo, temeteme dubu ro obotama nagi-emowasomai-ri nou temeteme aise gi-iroporeai-ri, neio ibo gorowati-rimo.

7

Godi edi kitamudiro owera ro nou se gi-ibodoro-ri

¹ Ata tau ato amia Parasi urubia Mose sabi kitamudiro urubia mutu Ierusarema sabowa

rido ioudo giodori-ro Iesu aboto. Neio na-gorowateai-rimo ito, nou bato goroho iato neio ro nou aise gemowaperai-rimo nou abato imese gorowotoi.

² Iesu kowasoro urubia neio ro nato giwia-rimo ohona giho-rimo keba se Iu urubia aramio nogenoge iedi tanaro ro na-isioidirotiti-mo neio ro ibodoro pua tu kiwiouti keba se nato kiho ie.

³ (Neio aramio nogenoge edi tanaro ro nou giwapotai-rimo neio aboto.

⁴ Iu urubia tanaro ibo ie ohona kimidai ato, neio ro ohona kimade moro rido iedi ohona ro samo to iho-ri pua, tau keba se neio tu mea mino to kiwiouti ie ido kiho ie mabu neio aboudo auna ia tanaro ie. Neio ro ibose arua tanaro tibodoro-dumo neio aramio nogenoge edi na giaremuti-rimo idaibo panikere sosopeni ohona kiaremuti nakomu neio simara tanaro to kiwiouti ie.)

⁵ Taie iedi Parasi urubia ro Iesu gomo ato na-gorowotoi neio ro na-giauri-rimo nou kowasoro urubia ro beda tanaro gosioidiro-birimo taie neio ro ibo Iesu aboto, 'Oro edi kowasoro urubia ro nimo aramio nogenoge edi tanaro ro neio ro ibodoro pua mea mino to. Neio ohona na-iho-dumo tu mea mino to iwiouti pua nimo aramio nogenoge beda sosoro mino to irowatiti-mo. Oro edi kowasoro urubia ro idaibo tanaro na-osioidiro-dumo mabu boira?'

⁶ Iesu ro serawo oweru nato gutura neio aboto, 'Nio aratigititi-dumo tanaro kisioidiro mutu ohu ato orowararioidiro-dumo, maumo to mea mino to imesebea pua. Keba ia se Aisaia edi oweru ro

na-garo morobise to garo nio sapuwo to ibo,
*Godi ro ibo Nodi urubia ro mo kemowabu oweru
to iarotiti-dumo kaupoti neio giropu musomuso
ia se iamotiti.*

⁷ *Neio ro ibose mo na-nemowabutiti-dumo
irowaguwoirotiti-dumo. Arua rubi aboto etou
sabi itamudiroiti-dumo mo ro iaremuti pua,
urubia nakara se giaremuti-rimo.'*

⁸ Iesu ina iato gutura neio aboto, 'Godi edi sabi
patu ro nio ro dorogora se huru to
iwatebe-dumo ina nio auna se iwasoro-dumo
urubia ro iedi sabi ro na-gisioidiro-rimo.

⁹ Nio morobise ia urubia ie! Nio ro Godi edio
kitamudiro oweru ro huru to iwatebe-dumo nio
simara kitamudiro tanaro koko se nou se
iroidiro ri.

¹⁰ Mose ro ta-gitomu *Simara mamu ra abera ra
mea ia mino to aise gi-iauri-mari.* Mose ro ibose
ta-gitomu ibo *Beda mere ra nou simara mamu ra
abera ra ubauba na-iwai-ma oweru to iedi mere
ro modobo ie nou kesuai aboto.*

¹¹ Ina nio ro titamudiro-dumo abora ibo
mamu ra abera ra aboto modobo ie ata mere ro
idaibo oweru kutura ibo, "Mo ata nakomu
tinorobidiro nitiro kiwarebai-ma sapuwo to.
Kaupoti nitiro mo ro iwarebai-mari pua nedi
namabu ro nou to. Mo ro Godi sapuwo to
ta-nedea." '

¹² Iesu ro a-gutura ibo, 'Iedi mere ro nio ro
emowauti-dumo ibo "Modobo pua oro mamu ra
abera ra kiwarebai-ma," nio ro odiobuti-dumo
nou.

¹³ Ina nio ro atamudiro-dumo nou ibo, "Aio,
auna tanaro pua Godi kitamudiro oweru nou
kibodoro aboto." Io, nio ro auna tanaro to

asoro-dumo simara sabi kiwasoro aboto, urubia nouto itamudiro-dumo. Arua idaibo sosoro tanaro nio ro tisioidiro-dumo.'

Urubia ubauba beda tanaro ro iwaititi

¹⁴ Iesu ro urubia sirio iato girumai nou aboto ou ri, taie neio nou ro iato gimowauti ibo, 'Nio mo oweri neito ma-dirowidiro-rimo maumo mea se ba-dimidai-mo.

¹⁵⁻¹⁶ Urubia ro ohona na-iho-dumo edi ohona ro urubia kimaragoidiro ubauba nou ro imowai-ri pua kaupoti urubia aboudo beda tanaro ro isuwoduti-dumo urubia neio ro kiwai ie ubauba.'

¹⁷ Iesu nou kowasoro urubia mutu iedi dubu patu ro na-gimeserai-birimo neibi simara moto to imese gou-birimo. Iesu nou kowasoro urubia ro iato gemodowa-rimo ibo, 'Iesu oro ro edi oweri to urubia na-imowauti nou maumo beda sosoro ra?'

¹⁸ Taie Iesu neio aboto aise gerewesegerai nou ro iato gimowapotai ibo, 'Nio kimaragoidiro patu timotimo se a-wiamo-ra? Ohona nio ro matagoro to na-iaromo-dumo iato niro turi to araremo-dumo, nio ubauba tanaro kisioidiro aboto nou ro iwaititi-ri pua.

¹⁹ Iedi ohona ro nio ro na-wiho-dumo giropu ato ereredeai-ri pua, iedi ohona ro kou e oro niro turi to. Iedi ohona ro iato nio durupi ato eredi-ri pua ioudo ina kosuruwo ie.' Iesu ro edi mino to garo nedi oweri ro nou ro imese sirio ohona kiho aboto gabo aise gimodobura, ata ohona ata sabi emedeai pua kiho aboto.

²⁰ Taie Iesu ro ina iato gutura, 'Etou tanaro kosuruwo ra urubia dubu aboudo io nou nou ro kowai ie ubauba.

²¹ Iedi ubauba tanaro ro urubia dubu giropu maumo rido kosuruwo ie idaibo ubauba kimaragoidiro, upi dubu osio busere korowadaudio, era gabo to koroho, piro tanaro kisioidiro, urubia kiopiauti,

²² simara durupi keremaragoidiro, ubauba tanaro kisioidiro arua rubi aboto, karasaubuti owera karo, ubauba tanaro kisioidiro ubauba owera karo arua rubi sapuwo to, masawe kerereauri, keremowabu, daro tanaro patu kimaragoidiro tato kisioidiro.

²³ Iedi ubauba tanaro sirio ro urubia neio ro kiwai ie ubauba.'

Ata kimibiria orobo ie

²⁴ Iesu ro iedi duriomoro na-gemeserai nou imese gidiai ata duriomoro to Taia sabowa abato na-owamo. Nou ito na-gorowateai ata moto to imese godoro taie iato gomidiro piro se nou ubi tato ie urubia ro kowea aboto ina nou modobo pua urubia aboudo koropiowa aboto.

²⁵⁻²⁶ Taie iedi tau ro nato ata orobo nou besere kainai ubauba urio ro oworohutititi kawakawa irohotiti. Nedi orobo ro nou Giriki orobo ie, nou Iu orobo pua, mamu ro nou Ponika duriomoro ato goroto, Ponika Siria duriomoro gebari nou maumo ato owamo. Iedi orobo ro Iesu nou ro na-gowea nou kauhio teibo to aise gomi taie nou Iesu iato gemagege inaina nou besere aboudo ubauba urio nou ro emowagare ri kawakawa edi na ro na-emowaititi.

²⁷ Taie nou Iesu ro iato gemowameai ibo, 'Modobo ie meamea ohona merebusere ro kiho neio kiamidimai sapuwo to, modobo pua merebusere edi ohona ro daimodaimo merebusere aboto kiaiwo.'

²⁸ Taie iedi orobo ro nou ro na-girowai nedi owera ro nou ro ibo 'Naramu Abera, mo umoro ie mo daimodaimo orobo ie, kaupoti merebusere mapapati daimodaimo merebusere ro kiwaroho modobo ie.'

²⁹ Taie Iesu ro na-gemororowai nou beda sosoro owera to gutura Iesu ro ibo, 'Io morobise owera aro-die, oro abora ba-dorowameai simara sabowa to oro besere aboudo ubauba urio ta-wosuruwo-ro.'

³⁰ Taie edi orobo ro imese gorowameai-ro moto to edi korowateai ro na-gorowateai nou besere kainai nato gowea keta ato gorobu ata kawakawa tato ie nou modobo ato gorobu edi ubauba urio ro nou aboudo ta-gosuruwo.

Iesu ro gare tato dubu gare gemodobura

³¹ Iesu Taia duriomoro na-gemeserai nou imese gidiai Sidoni duriomoro to ina imese godori-ro Gariri obo paruo to ina 10 sabowa bato giamo edi duriomoro ro neito gagediai-ro.

³² Nou iato na-goroho arua urubia ro nato gowou-rimo ata dubu nou aboto nou ro meana owai ri, nedi dubu ro owera kirowidiro pua gare teibo ta-goropai-rido ibose nou owera mea se iarotiti pua.

Taie Iesu neio ro iato gemagege-rimo nedi dubu ro nou ro meana owai ri.

³³ Iesu ro na-girowai neio edi owera ro edi dubu ro nou ro aise gemaiddorai taie neitiro

urubia tato moro to imese gou-rido iato nou tu mopokoi teibo iedi dubu ro nou gare goro teibo to aise giwodoro-ma. Taie nou ro na-gemamorotai ototobe iato gowasomai.

³⁴ Nou toboro ohu to iato gawota huhuame na-gimusubai taie iato gutura 'Epata!' (Epata maumo owamo ibo 'Dorodobura'.)

³⁵ Iesu ro beda tau ato gosioidiro iedi tanaro ro edi dubu ro nou gare teibo aise gorodobura-rido iato nou owera mea se gutura.

³⁶ Taie nou ro ibo urubia aboto, 'Nio ro orowauti ate nedi owera ro modobo ie nio ro nakara se korobidiro aboto!'

Kaupoti urubia ro nedi owera ro aise giheruti-rimo moromoro.

Nou ro inaina na-gimowauti ibo 'orowauti ate' inaina neio ro ibose to gobodorouti-rimo duriomoro gabogabo to.

³⁷ Neio ro idaibo tanaro kiauri pua abora tanaro ro gororosoidiro neio aboto neio auna se gimaragoidiro-rimo.

Taie neio nakara se iato geremowauti-rimo, 'Iesu ro imese tanaro patu mea se isioidirotiti. Nou modobo ie gare tato dubu gare kemodobura ie ibose owera karo tato dubu nou owera karo aboto meana kowai ie.'

8

Iesu ro auna topira ohona to giwarebai

¹ Ata tau ato Iesu ina auna dubu patu ro iato gemosopa-rimo, iedi urubia ro ata ohona tato gou-rimo. Taie Iesu ro iato gutura nou kowasoro urubia aboto,

² ‘Mo auna ia nirimagare ro nowati nedi urubia ro neio beda sosoro aradabuti-dioumo mo aboto ina neio neibi mutu ta-irowomidiro titi netewa didi saiki to. Neio ata ohona tato orowomidiro mo ro ti-niauri

³ neio sogoi ro iwati ina neio mo ro kiho tato kimeriai ato simara sabowa to orowame ri, neio ata modobo pua ipi gabo ato karaburai. Neio amia moro muso rido goroho-dioumo.’

⁴ Ina nou kowasoro urubia ro ibo gemowameai-rimo, ‘Nimo urubia tato moro ato norowomidiro, neio iwarebai na ohona boido namadimi-iwai-ri?’

⁵ Taie Iesu ro iato gimodowa-ibi ibo, ‘Nibi abato dokou koura beda mutu ro iamo?’
‘7 ro iamo,’ neibi ro ibo.

⁶ Taie nou ro iedi urubia ro iato gimowapotai goto ato orowomititi ri. Nou ro na-gimidai iedi dokou koura ro iato gisebuti taie eso owera iato garo Godi aboto. Taie nou ro iedi dokou kisebuti ro imese giaiwai kowasoro urubia aboto, neio ro urubia iato gimoworoho-rimo.

⁷ Ina atu sosoro tanaro ibose to gisioidiro sipu tato nakere kainakaina na-gisebuti eso owera iato garo Godi aboto, taie iato giaiwai nou kowasoro urubia aboto neio ro urubia iato imese gimoworoho-rimo.

⁸ Taie imese sirio urubia na-giho-rimo imese modobo ti-go-ri-rimo ti-giamidimai.

Mapapati urubia ro na-gimeserai-rimo nou kowasoro urubia ro iato gidabuti-rimo neio ro 7 awawo gatere nou giodiowado-rimo.

⁹ Edi topira gebari ro kioputi ato neio imese 4,000 urubia ie. Taie nou ro iato gimowapotai

ibo, 'Modobo ie nio korowameai simara sabowa to.'

¹⁰ Iesu kowasoro urubia mutu pe to kiora obo paruo sapuwo rido imese giabu-birimo Daramanuta duriomoro to.

Amia Parasi urubia ro Iesu a-gowaibia-rimo

¹¹ Amia Parasi urubia iato gou-rimo Iesu aboto neio ro nou owera to iato gorobai-rimo ina neio ubi ie nou owaibia ri. Neio ubi ie umoro oi ri ibo nou Godi kohodowa dubu ra o nou pua ra. Neio ro nou iato gemodowa-rimo ibo Godi pupuwo to ata korosa tanaro nou ro osioidiro ri.

¹² Taie Iesu ro na-gimorowai neio nou masawe to iato gutura, 'Ei! Abora nedi urubia ro na-orowomidiro mabu boira nio ro kosora ata korosa tanaro mo ro kosioidiro aboto? Nio mo ro a-nimowapotai ata korosa tanaro ata mo ro osioidiro-ri pua nedi tau ro nato nio ro kiauri aboto.'

¹³ Taie Iesu ro edi urubia ro aise gibedidiro-ro nou imese godori pe to korora kahioma imese gabu obo paruo ata sapuwo to. Taie.

Kowasoro urubia ro umoro oi pua

¹⁴ Iesu kowasoro urubia mutu na-gou pe to neio ro kaupoti dokou koura gomidai-rimo, neio ro dokou auna se kimidai aboto woki gimati-rimo.

¹⁵ Taie, Iesu ro umoro owera nato gimia, 'Umoro umoro se nio keremowotoi mutu Parasi urubia Herodi mutu neio edi isiti parawa ro nio ro kowasomai modobo pua.'

¹⁶ Taie kowasoro urubia nato gatamuai-rimo keremowagomea maumo na-gosora-rimo. Neio

ro ibo, 'O nimo dokou tato nou-dियो nou mabu ato utura-die nou.'

¹⁷ Neio beda sosoro geremowagomea-rimo Iesu ro neio kimaragoidiro ta-gimowea taie nato gimodowa, 'Nio etou mabu ato eremowagomea-dumo ibo "Nimo dokou iwou pua neito"? Nio mo ro na-niauri idomari mea se irarowea pua nio kimaragoidiro tato ie.

¹⁸ Nio idomari mutu e kaupoti irarowo pua kiopai orowomidiro. Nio gare teibo mutu e kaupoti nio gare koropai orowomidiro. Mo ro beda tanaro nisioidiro keba se nio ro woki a-gimati-dumo ra, a?

¹⁹ Nimo keba se dokou tato na-norowomidiro ina nimo ro auna ia topira ti-nowea-rimo, 5 dokou mo ro na-nimesebuti ina neio ro ti-giho-rimo, mapapati edi na gimeserai-rimo beda mutu gatere giodiwado-rimo nio ro?'

Neio ro ibo, '12.'

²⁰ 'Ibose ata topira mo ro 7 dokou na-nimesebuti neio ro na-giho-rimo mapapati edi na gimeserai-rimo beda mutu gatere giodiwado-rimo nio ro?'

Neio ro ibo, '7.'

²¹ Taie Iesu ro ina iato gutura neio aboto, 'Tanaro maumo nio ro umoro oi pua ra, a?'

Idomari pogo dubu meana gowai Iesu ro

²² Iesu kowasoro urubia mutu na-gou-rimo Betesaida sabowa to arua urubia ro nato gowou-rimo ata pogo dubu nou aboto. Taie neio ro nato gediawado-rimo iedi dubu ro nou sapuwo to idomari teibo meana emowai ri.

²³ Iesu ro iedi dubu ro aise gatopea-ro neitiro imese gou-rido urubia tato moro to. Iedi dubu ro idomari teibo na-gemamorotai taie tu teibo na-giwateai-ma taie nato gemodowa, 'Oro modobo ato a-irarowea-ra?'

²⁴ Taie nou ro ibo, 'Io modobo ato nirarowea, urubia mo ro ti-niauri kaupoti neio ota sosoro iagegemowado-dumo.'

²⁵ Taie ina mea se iato gemowasomai, edi tau ro nato edi dubu ro mea se aise girarowea.

²⁶ Iesu ro edi dubu ro moto to na-gotiodorai iato ibo gemowapotai, 'Oro sabowa to oroho ate urubia imowapotaiddiro ate nedi tanaro ro na-nosioiddiro, moto ato se ba-domiddiro!'

Pita ro Iesu nato geibimai ibo nou Godi ro kohodowa dubu e

²⁷ Iesu nou kowasoro urubia mutu imese gidiai-rimo ata auna sabowa tararasoro Siseria-Piripai to arua sabowa ibose ta-giamo nou gomo ato neito gidiai-rimo. Ipi ato Iesu ro nato giratoro neio ibo, 'Urubia ro mo etu to nasoro-dumo?'

²⁸ Taie neio ro wisa ibo gemowameai-rimo, 'Arua urubia ro irowautiti-dumo ibo oro Ioane ie obo to edi dubu ro giwarumiauti, ina arua urubia ro asoro-dumo oro Eraia ie, ina ibose arua urubia ro irowautiti-dumo oro ata Godi ipusu oweru dubu e nou ro gorowameai-die.'

²⁹ Ina Iesu aise gerewesegerai neio aboto, 'Ina nio ia ro mo etu to nasoro-dumo?'

Pita ro ibo, 'Oro Godi ro kohodowa dubu e.'

³⁰ 'Nio ro mo sapuwo to orowauti ate ibo mo Godi kohodowa dubu e.'

Iesu nou simara pamo koweia sapuwo to geremabowa

³¹ Pita ro na-geibimai ibo Iesu nou Godi ro kohodowa dubu nou se ie, taie Iesu ro iato gatamuai nou kowasoro urubia kitamudiro aboto ibo, 'Mo nou se ie Imese Urubia Kiauri Dubu. Imese Urubia Kiauri Dubu to na-gapoi nou ro temeteme sirio ama-iwia-ri. Nou duriomoro eputa urubia ro, Mose sabi kitamudiro urubia ro, turituri urubia neio awawo urubia ro nou masawe neio ro amadimo-owea-ri, temeteme amadimo-omia-ri iato amadimo-opia-ri. Imese Urubia Kiauri Dubu to na-gapoi nou pamo ama-owea-ri, iato saiki teibo namado-oroporeai-ri ata saiki ato nou keremiro nato ama-owea-ri.'

³² Iesu ro neio paea mata se gimowapotai beda tanaro ro amadimo-ororosioiido-ri nou sapuwo to. Pita ro na-giowai edi owera ro nou ro Iesu nakara moro to aise gadabuai nou owera a-gemowabeouti ibo, 'Oro idaibo owera etou ri aro? Ororosioiido-ri pua iedi tanaro ro!'

³³ Ina Iesu iato gerewesegerai nou kowasoro urubia aboto, Pita ibose nou ro iato gemadohodai, 'Satani oro mo aboudo daragare! Oro edi kimaragoidiro ro duriomoro kimaragoidiro ie, Godi kimaragoidiro pua.'

³⁴ Taie Iesu ro urubia iato giramairiai, nou kowasoro urubia mutu atu se nou aboto osiomai ri. Nou ro ibo gimowapotai, 'Ata dubu nou ubi mo ubi tanaro kisioidiro aboto nou nakara se simara durupi eremaragoidiro-ri pua, nou simara ubi tanaro isioidiro-ri pua, modobo ie

Godi ubi tanaro kemesioidiro, ina karaburai nou sapuwo to, io modobo ia ie.

³⁵ Oro keremiro simara ubi tanaro ato nama-owaboi-ri io oro ro ama-aseperai-ri. Kaupoti oro durupi mo sapuwo to kaseperai ato daro mea owera kimowauti sapuwo to oro keremiro imese tau koworohuti ie pamo tato ie.

³⁶ Oro imese namabu sirio na-irobidiro ina oro pamo nama-owea-ri era ato ama-omidirotiti-ri modobo ra oro aboudo? Io modobo pua.

³⁷ Urubia dubu keremiro mani to kowameai modobo pua, ata gabo tato ie.

³⁸ Abora nedi tau ro nato urubia na-orowomidiro neio imese sirio se ubauba ia ie mea tanaro isioidiro pua, morobise tanaro isioidiro pua Godi aboto. Mo etio ro nemowabe-dumo ibose mo owera etio ro aratiou-dumo wisa na neio mo ro ubi tato anama-iwia-ri. Mo nou se ie Imese Urubia Kiauri Dubu to Na-napoi-ro mo korowameai tau ato edi urubia ro neio sapuwo to mo ubi tato anama-oi-ri. Mo namadi-orowameai-ri Godi sowake urio sirio neio mutu mo abera edi woroworo ro nou ato anamadi-orowameai-ri.'

9

¹ Iesu iato gutura nou kowasoro urubia aboto sabowa urubia mutu etio ro gorowotoi nou abato, nou ro ibo, 'Nio morobise owera niwapotai nio arua nama-orowomidiro-ri nio ro amadimo-owea-ri Godi eputa dubu to nama-omi-ri nou ro kiwaboi tanaro nio ro amadimo-owea-ri pupuwo mutu amadi-orowapotai-ri.'

Iesu durupi benenio ia se gowotoi

² 6 saiki na-goroporeai-rimo Iesu netewa didi kowasoro dubu peteibi Pita Iemisi Ioane neibi mutu imese gidiai-birimo podo ohu to. Neibi iato nakara moro ato gomidiro-birimo iedi tau ro nato neibi sosoro gabo ato Iesu durupi aise garatidiai ata sosoro gotoi.

³ Nou obotama benenio ia se gerememiouti imese keakea ia ie ata pokiri iopu tato ie. Nou edi obotama ro imese keakea ia ie, ata dubu keakea obotama mutu keremodobowa modobo pua.

⁴ Eraia ra Mose ra neibi abato nato gorowapotai-rido, taie neitiro Iesu mutu ower a imese geremowauti-birimo.

⁵ Pita ro iato gutura Iesu aboto, 'Kitamudiro dubu, neibi abora kamade ie modobo ato nioro-diebimo neito, nibi sapuwo to mapagea peteibi anamabimi-imotomai-biri, ata oro do ie, ata Mose do ie, ata Eraia do ie.'

⁶ Pita ro ower a tere sobosobo gutura Iesu aboto neibi atu se tere ro girobai-bi.

⁷ Ina neibi toboro kere ro aise giahidimai-bi. Iedi toboro kere maumo ro noudo ower a kodu nato gemerorowai-birimo ibo, 'Io mo mere ie ina mo auna ubi tiamo nou aboto. Nou ro beda ower a karo ra modobo ie nio ro aise kosioidiro.'

⁸ Taie neibi iato na-girarowea-birimo nato Iesu se gowea-birimo nakara se na-gotoi neibi abato, netewa teibo dubu teibo ta-garaseperai-rido nou aboudo, iato Iesu neibi mutu atu se ioudo imese giroruwo-ibiro podo ohu rido.

⁹ Neibi na-giroruwo-ibiro nou ro neibi umoro ower a iato gimia-ibi, 'Nibi neido

namabimo-orowameai-ri mo ubi tato ie arua
urubia kimowauti beda sosoro tanaro
owea-bimo nato womu tato Imese Urubia Kiauri
Dubu na-gapoi namadimo-opia-ri ina
amadi-eribua-ri.'

¹⁰ Taie Iesu ro beda sosoro oweru to gitomu-bi
neibi aise gimibiria-birimo. Neibi neido
na-gorowameai-birimo ata oweru ata orowauti
pua. Kaupoti neibi nakara moro ato nato
geremowagomea-birimo ibo, 'Nedi keribua
oweru ro maumo beda sosoro ra?'

¹¹ Taie neibi ro Iesu iato gemodowa-birimo
ibo, 'Mabu boira Mose sabi kitamudiro rubi
na-iarotiti-mo ibo Eraia keba se
amadi-orowameai-ri ina Godi ro kohodowa
dubu nou ro amadi-ou-ri saro rido?'

¹² Taie nou ro nato gimowameai-bi ibo,
'Morobise ie Eraia ro ti-gorowameai-ro keba se
tanaro patu nato imododiai ri. Eraia ro imese
namabu patu meana ta-giwai nou ro gabo
ta-gosowa keba se. Ina mabu boira Tarena Buka
oweru ro ibo na-waru Imese Urubia Kiauri Dubu
to na-gapoi temeteme imidai ri ina urubia sirio
ro nou ubauba mino to amadimo-oworohuti-ri?'

¹³ Mo ro a-nutura nibi aboto ibo Eraia neito
ta-gorowameai-ro ina urubia ro nou neito
goworohuti-rimo simara ubi tanaro to. Tarena
Buka oweru ro beda sosoro garo aise
gororosioi-ri-ro nou sapuwo to.'

*Ata mere ubauba urio ro na-goworohuti Iesu ro
gowai meana*

¹⁴ Iesu podo rudo na-gororuwo-ro netewa didi
dubu peteibi mutu neibi neido
na-girarowea-birimo auna topira gebari nou ro

gorobu. Iesu kowasoro urubia, Mose sabi kitamudiro urubia mutu a-gorosobi-rimo.

¹⁵ Taie iedi topira gebari ro Iesu ato a-gorowadaudio ina neio nou aboto imese gorowarario-rimo nou kamade owai-ri.

¹⁶ Neio Iesu ro nato gimodowa, 'Nio oweri to etou mabu ato ororobai-dumo Mose sabi kitamudiro urubia mutu?'

¹⁷ Ata dubu oweri mutu nato gotobowa-ro edi topira maumo noudo, 'Mo mere nowou-die oro aboto nou ubauba urio ro oworohuti, ibose nou oweri iarotiti pua.

¹⁸ Nou ubauba urio ro serawo beda tau ato koi ra, nou iato aise keteamoidiro ie goto ato, matatabu korodi imese korobu e, ibonoro kirikiriri se gi-owaro-ri. Nou ibose goto ato korobu ato tu ra sairo ra koko poroporo kiwaititi ie. Ina oro kowasoro urubia ta-niratodai nedi ubauba urio ro neio ro emabodori ri nou aboudo, kaupoti neio ro modobo pua kemabodori.'

¹⁹ Iesu nato gerewesegari neio aboto ibo, 'Nio kimibiri tato urubia ie! Mo dese a-neremiri ra nio mutu koroho? Mo beda mutu saiki niporeai nio mutu? Neito ma-dowou-birimo edi mere ro!'

²⁰ Taie iedi mere ro korobai simara abera ro urubia mutu neio ro imese gowou-rimo Iesu aboto. Iedi kowou ro na-gowou-rimo Iesu ubauba urio ro nato na-gowea-ro edi mere ro aise geteamoidiro imese gorowawodorowado matagoro rido matatabu se gosuruwo-rimo.

²¹ Taie Iesu na-gerewesegari abera aboto nato gemodowa ibo, 'Nedi mere ro idaibo tanaro beda tau ato gerematamui?'

Abera ro ibo, 'Nou kainai ato gerematamuai idaibo tanaro kisioidiro.

²² Iedi mere ro ubauba urio ro opia ri emirititi, ata tau era to katowo ie ina obo to iato kowamotoro ie. Bagea pua, oro ro natonato dimati-ro nimo, diwarebai-ro! Oro modobo ra idaibo tanaro kisioidiro?'

²³ Iesu ro iato gemowameai ibo, 'Oro etou mabu rudo utura-die idaibo owera? Morobise kimibiria etu ro oworohuti nou aboudo modobo ie imese tanaro kisioidiro aboto.'

²⁴ Ina iedi dubu ro iato giaia, 'Mo kimibiria mutu e. Mo dowarebai-ro kimibiria pupuwo demowai-ro!'

²⁵ Iesu na-girarowea topira gebari na-gorowoiriamuti-ro nou aboto nou ro nato gemadowerai edi ubauba urio ro. Iesu ro ibo, 'Oro ro edi mere ro gemadohuti owera karo moro rudo, ibose gare kirowidiro moro rudo. Oro pamo dubu sosoro na-omidiro dosuruwo edi mere ro demeserai-ro, oro neito orowameai ate ina!'

²⁶ Iedi ubauba urio ro parara gebari nato gutura iedi mere ro aise geteamoidiro goto ato pamo se gereresuai, taie iedi ubauba urio ro imese gosuruo-ro nou aboudo. Iedi mere ro imese gorobu. Arua urubia ro ibo, 'Pamo se esuai mere poti.'

²⁷ Iesu ro iedi mere ro na-gemesiomai tu rido na-gorobai aise gowotobowa.

²⁸ Iesu moto to na-gorowameai kowasoro urubia ro nato gemodowa-rimo nakara moro ato, neio ro ibo, 'Mabu boira nimo ro iedi ubauba urio ro owagare tato?'

²⁹ Ina Iesu ro ibo, 'Egeaegea tanaro kisioidiro modobo pua idaibo sosoro ubauba urio kimabodoidiro aboto, kararatoro nou se ie kaupoti nio ro neito kiwagarewado ie.'

Iesu ina geremabowa simara pamo sapuwo to

³⁰ Iesu nou simara kowasoro urubia mutu iedi duriomoro ro na-gemesera-imo neio ina imese goroho-imo Gariri duriomoro ato. Iesu nou ubi tato ie urubia umoro koi ibo nou kowasoro urubia mutu nato torowomidiro, neio piro se goroho-imo.

³¹ Nou ro kowasoro urubia iato gimowapotai ibo, 'Imese Urubia Kiauri Dubu to na-gapoi nou urubia ro amadima-apoi-ri iato amadimo-orobai-ri, ina amadimo-opia-ri, kaupoti netewa teibo saiki teibo namado-oroporeai-ri ina ata saiki ato amadi-eribua-ri bobo rudo nou keremiro ama-owea-ri ina.'

³² Nou ro ibo gitamudiro idaibo sosoro kaupoti nou kowasoro urubia ro nou beda sosoro owera to geremowagomea maumo meana se ememidai pua mabu neio tere ro giwati nou kemodowa aboto.

Auna to etu ro ama-ararasoro-ri

³³ Iesu nou kowasoro urubia mutu imese giodori Kapeniamu sabowa to, taie neio moto goro to na-gemibiria iato imese gorowomititi.

Iesu ro neio nato gimodowa, 'Nio gabo ipi ato otona owera to eremowagomea-dumo?'

³⁴ Ina kowasoro urubia ro nou owera na-gemororowai-imo neio owera tato se gorowomidiro mabu neio edi owera to

na-geremowagomea-rimo ibo owamo auna to etu ro ama-ararasoro-ri idaibo sosoro to geremowagomea-rimo.

³⁵ Taie nou ro neio na-giramairiai nou ia na-gomi taie nato gimowauti, 'Etu ubi ra auna to kararapoi aboto nou modobo ie kainai to kararapoi amia urubia sowake koroho.'

³⁶ Iesu ro mere kainai iato garamairiai turi ato aise gowotobowa, neio ro owea ri taie iato gatopea.

Ina nou ro iato gutura,

³⁷ 'Etu ro kemaiddorai ra idaibo sosoro mere kainai mabu nou mo do ie, idaibo sosoro mo nou ro kemaiddorai ie. Mo etu ro kemaiddorai ra ibo pua mo nakara se kemaiddorai, kaupoti mo iedi dubu ro na-nemeiriai-ro nedi duriomoro ro neito nou ro nou ibose kemaiddorai ie.'

Eti ra ubauba kisioi diro tato nimo aboto io neio nimo do ie

³⁸ Ioane ro iato gemowapotai Iesu ibo, 'Kitamudi ro dubu, ata dubu nimo ro ta-nowea-rimo oro pupuwo to ubauba urio sirio nou ro gimabodoidiro urubia aboudo. Ina nimo ro nou egea se nodiobuti-dumo idaibo tanaro kisioi diro aboto mabu nou nimo mutu iradabutiti pua.'

³⁹ Taie Iesu ro Ioane iato gemowameai ibo, 'Idaibo dubu nio ro adohodai mamo idaibo tanaro kisioi diro ato, ido edi dubu ro nou ro mo masiro ubauba owai-ri pua.

⁴⁰ Eti ra ubauba kisioi diro tato nimo aboto io nou ia ro ama-iwatuti-ri nimo aboto.

⁴¹ Mo ro morobise owera nio nio aboto, ata dubu ro nio obo nupu kimia ato mabu nio mo gu

urubia ie, iedi dubu ro morobise ie nou ro mea wisa ido ama-imidai-ri.'

Auna ubauba wisa Godi aboudo koweia ie

⁴² Iesu ro ina iato gimowauti nou kowasoro urubia mere kainakaina sapuwo to nou ro ibo, 'Mo owera beda mere kainakaina ro na-irowidirotiti-dumo ina na-isioidirotiti-dumo, ina mere kainai boinana ata dubu ro nou ubauba osioidiro ri na-owaboi ina iedi mere kaina ro nou ro na-osioidiro ubauba tanaro, iedi dubu ro nou ro auna ia ubauba wisa koweia ie. Godi nou aboto auna serawo ama-oi-ri. Iedi dubu ro mere kainai ubauba to etu ro gowodoro nou aboudo modobo ie auna nadi wagoha rudo kemebuai oromo damo to keherai, nedi wisa ro kainai ie. Kaupoti Godi ro iedi wisa ro nama-aiwai-ri iedi dubu ro nou aboto auna ia ubauba wisa ama-aiwai-ri.

⁴³⁻⁴⁴ Ina oro tumodi tu to ubauba tanaro neito na-osioidiro oro ro, modobo ie iedi tumodi tu ro kemotoria ina keherai. Io meana ia ie, oro tu kaupoti mutu womu tato womu tato keremiro ama-owea-ri. Modobo pua oro tu teibo mutu ubauba tanaro kisioidiro era to katowea ie. Iedi era ro duwo saiki, duwo saiki aise irewaretiti. Era iato korodouti pua ibose tiriwaretiti.

⁴⁵⁻⁴⁶ Ina ibose ie oro sairo ro na-wowou ubauba tanaro kisioidiro aboto modobo ie oro ro iedi ata sairo ro kemotoria ina keherai, io meana ia ie oro sairo kaupoti mutu womu tato womu tato keremiro ama-owea-ri. Modobo pua oro netewa teibo sairo mutu ubauba kisioidiro era to katowea ie.

⁴⁷ Ina ibose ie oro idomari ata ro ubauba ubi na-emedea ata idomari kaubidiro modobo ie keherai ina kaupoti idomari mutu kodoro Godi

edi mea sabowa ro neito. Mabu io mea tanaro ie idaibo sosoro oro kaupoti idomari mutu kodoro. Modobo pua oro idomari teibo mutu ubauba tanaro kisioidiro, era to katowea ie,

⁴⁸ iedi era ro nato *“poporo gebari gebari tirohotiti-dumo neio korowaburo pua, nibo ohona ihotiti-dumo. Ina iedi era ro duwo saiki duwo saiki aise irewaretiti.”*’

⁴⁹ Iesu ro ina iato gimowauti, ‘Oro aboto mibo tau kou ato nou idaibo era sosoro ie. Urubia maumo tanaro idaibo sosoro era ro ama-iwaibirio-ri. Idaibo sosoro ie damena ro ohona mea topo kowai ie, era ro urubia ibo ama-iwaibirio-ri.

⁵⁰ Damena topo meana ie, damena topo na-wasoperai ohona topo tato ie. Ina etou nakomu namadimo-osioidiro-ri damena ina topo kowai aboto? Damena topo tato imese koi ie topo imese kasoperai ie.’

Ina noudo ie Iesu ro ibo, ‘Modobo ie imese sirio tau mea se gi-owomidiro-ri nio komidiro keremiro mea se gi-owaboi-ri. Nio komidiro keremiro maumo ato mea damena topo kiamo modobo ie, ibose miro to gi-owomidiro-ri korowomidiro.’

10

Iesu ro upi kiraribo nou sapuwo to gitomu

¹ Iesu nou kowasoro urubia mutu Kapeniama sabowa na-gemeserai-birimo Gariri duriomoro ato na-owamo neio atu se imese giodori Iudia duriomoro to. Ina ioudo Iodeni oromo sapuwo to imese giabu-rimo, iedi duriomoro ro nato Iesu aboto auna ia dubu patu ro garadabuti-rimo.

Nou beda sosoro irowatititi urubia nou ro kiwia
ato totomu iato gi-imowauti-ri.

² Taie iedi tau ro nato arua Parasi urubia nato
gou-rimo nou aboto. Nou neio ro nato
gemodowa-rimo neio ubi ie nou owaibia ri
bagea to garatodai-rimo ibo, 'Sabi ra ata dubu
orobo kararubia?'

³ Iesu ro neio ina iato gimodowa, 'Nio keba se
Mose ro ata sabi ata nou sapuwo to kimia pua
ra?'

⁴ Parasi urubia ro ibo, 'Mose sabi ro ibo
nimowapotai-ro beda dubu ra orobo giropu tato
kovea nou ro na-wararubia iedi dubu ro
modobo ie orobo kararubia peba titi
kemesioidiro keba se ibo "mo ubi tato ie nedi
orobo ro nou aboto imese nalarubia," taie iedi
dubu ro nou orobo imese moro to kararubia ie.'

⁵ Taie Iesu ro Parasi urubia iato gimowauti ibo,
'Nio Mose ro nedi sabi ro nou ri gimia mabu nio
kimaragoidiro mutu imese koko ia ie, nio imese
auna akau urubia ie. Nio ro Godi edi kitamudiro
owera ro modobo pua meana se kimidai aboto,

⁶ kaupoti keba ia tau ato Godi ro edi tau ato
na-gisioidiro imese sirio nakomu *nou ro orobo
ra dubu ra ibose ta-gisioidiro-ma.*

⁷ *Ina nou do ie urubia mere ro mamu ra abera
ra nou ri kimeserai-ma ie nou orobo mutu atu
moro ato komidiro.*

⁸ *Neitiro imese tanaro kisioidiro ato kaupoti
owera to kisioidiro ie mabu neitiro kaupoti ie.*

⁹ Godi ro neitiro na-gidabuai-ma modobo pua
ata ro kihodowa-ma aboto, neitiro abora orobo
ra uramu ra ie neitiro abora kaupoti ie.'

¹⁰ Taie Iesu kowasoro urubia mutu adimo na-gorowameai-rimo moto to, Iesu neio ro nato gemodowa-rimo upi kiraribo sapuwo to.

¹¹ Iesu ro neio ibo gimowameai, 'Beda dubu ro ararubia orobo ina orio orobo nato na-wedea iedi dubu ro nou ro auna ia ubauba tanaro kosioidiro ie nou keba orobo aboto, sabi kesebea ie nou ata orobo aboto na-oroho.

¹² Ina atu sosoro ibo ie orobo ro na-wararubia nou simara uramu ina ata dubu ro nato na-wedea, iedi orobo ro nou ro auna ia ubauba tanaro kosioidiro ie nou keba uramu aboto, sabi kesebea ie nou ata dubu aboto na-oroho.'

Iesu ubi ie merebusere kainakaina ou ri nou aboto

¹³ Iesu kowasoro urubia mutu iedi duriomoro nato na-gorowomidiro arua urubia neio merebusere Iesu ro iwaseidiro ri nato giworoho-rimo. Nou kowasoro urubia ro na-giauri-rimo mamio abeamio merebusere na-giworoho-rimo Iesu aboto neio masawe ro giwati.

¹⁴ Taie neio Iesu ro iato na-giwia neio beda mino gisioidiro-rimo nou masawe goi nou kowasoro urubia aboto, taie nou nato gutura ibo, 'Nedi merebusere kainakaina ro modobo ie mo aboto kiworoho, modobo pua nio ro na-idiobuti-dumo mabu Godi ro kiwaboi tanaro idaibo merebusere kainakaina ro neio ro modobo ato kisioidiro ie tanaro.

¹⁵ Nio imese morobise oweru nimowapotai etio ra Godi kiwaboi tanaro maumo neito kodoro tato nedi merebusere kainakaina beda sosoro godoro-rimo iedi urubia ro Godi edi kiwaboi tanaro maumo neito kodouti modobo pua.'

¹⁶ Iesu merebusere kainakaina na-girobai-ro iato giohi nou tu teibo neio eputa to iato gitomo neio korosa iato gimio.

Namabu sirio dubu ro gemodowa Iesu

¹⁷ Iesu iedi duriomoro kemeserai nophonopo ie ata dubu nou aboto nato girario-ro kauhio to goto ato aise girumusubua Iesu sosoro gabo ato taie nou ro nato gutura ibo, 'Mea kitamudiro dubu, mo womu tato womu tato keremiro beda sosoro nama-owea-ri?'

¹⁸ Ina iedi dubu ro Iesu ro nato gemowameai ibo, 'Mo oro ro mea dubu to etou mabu ato napoi-die? Ata mea dubu ata omidiro pua Godi kaupoti nakara se imese meana ia ie.

¹⁹ Oro umoro ie Godi ro edi sabi giaiwai-ro oro ro keremoputi ie idaibo, *Urubia iopiauti mamu, Arua urubia mamio iwadaudiro mamu, Namabu piro to iwopiro mamu, Koto tau ato urubia owera kakate moro to imoworohuti mamu, Tanaro kisioidiro mutu urubia imatigi mamu, Mamu ra abera ra mea mino to gi-iauri-mari.*

²⁰ Iedi dubu ro nou ro ibo, 'Mo kaina rido naratamuai-ro womu tato abora iedi sabi sirio ro mo ro ti-nibodorotiti.'

²¹ Iesu idomari na-giwawota iedi dubu ro nou ato se giwotobowa natonato gemati, nou ro iato gemowapotai, 'Oro ro kaupoti tanaro osioidiro pua. Oro beda mutu namabu sirio iworohuti, mani to ba-mowamade-mo, ina edio mani ro namabu tato urubia ba-dimio, ina mo aboto nato ba-daradabuai-ro ido oro Godi sabowa ato womu tato womu tato keremiro nato ama-owea-ri.'

²² Iedi dubu ro nou ro na-girorowai iedio oweru ro nou aborabora ro gorobai Iesu ro beda sosoro oweru to gemowapotai, koko ia ie idaibo tanaro nou ro kosioidiro aboto mabu nou auna se gimaragoidiro namabu aboto koko ia ie nou ro kiaiwo aboto. Taie nou aise gororoupiriai ata oweru ata utura pua.

²³ Ina Iesu iato gerewesegerai kowasoro urubia aboto nou ro nato gimowauti, 'Merebusere Niramio tanaro auna ia koko ie idaibo sosoro urubia neio aboto, Godi edi kiwaboi tanaro maumo ro neio neito kodouti aboto.'

²⁴ Nou kowasoro urubia kimaragoidiro ro giopia neio ro na-girowai-rimo idaibo oweru. Iesu ro ibo, 'Auna koko ie Godi edi kiwaboi tanaro maumo ro neito kodoro aboto ibose auna ia koko ro ama-owamo-ri namabu sirio urubia neio ro Godi edi kiwaboi maumo ro neito kodoro aboto.'

²⁵ Io idaibo sosoro ie kemoro kodoro ra nira kainai goro rido keresia ra ata sapuwo to? Modobo pua io! Ina idaibo sosoro ie suana sirio dubu ro kodoro koko ia ie Godi edi kiwaboi tanaro maumo neito.'

²⁶ Iesu kowasoro urubia ro na-girowai-rimo neio auna ia se gimaragoidiro-rimo taie nakara se iato geremowagomea-rimo. Neio ro ibo, 'Ata dubu ata ro womu tato keremiro beda sosoro kowe ra?'

²⁷ Iesu neio aboto na-girarowea iato gimowapotai, 'Nedi tanaro ro sopu dubu ro kisioidiro modobo pua. Godi nakara se modobo ie kisioidiro aboto nedi tanaro ro. Godi nou

nakara se modobo ie imese sirio tanaro kisioidiro aboto.'

²⁸ Pita ro iato gutura Iesu aboto, 'Imese beda mutu nakomu sirio ra nimo ro ta-nimeserai-rimo, oro nimo ro saro rido ti-nowasoro-dumo.'

²⁹ Taie Iesu ro nato gutura ibo, 'Nio mo ro morobise ia oweru nimowapotai, etu ro kemeserai ra simara sabowa, niramio naramio mamio abeamio medamio mabiamio dokou suwa duriomoro mo sapuwo to daro mea oweru kimowauti sapuwo to,

³⁰ nedi duriomoro ro nato oro sirio moto mutu e, sirio mamio mutu e, sirio naramio niramio mutu e sirio medamio mabiamio mutu e dokou suwa duriomoro mutu e, oro ina ido womu tato keremiro ama-owea-ri. Oro ibose mo sapuwo to arua urubia ro ubauba se amadimi-oworohuti-ri mabu oro mo do ie.

³¹ Etio ra keba to na-wou-dumo neio saro to ama-iweisia-ri, ibose etio ra saro rido na-orumudidiro-dumo keba to neio ama-iweisia-ri.'

Iesu ina geremabowa simara pamo sapuwo to

³² Iesu urubia mutu atu se Ierusarema to kidiawado gabo nou gidiai-rimo. Iesu ro gimomudo gabo keba se Ierusarema sabowa to urubia sirio ro nou saro rido gobodoro-rimo. Nou edio tanaro na-gisioidiro kowasoro urubia auna se gimaragoidiro-rimo ina dorogora urubia etio ro gidiai-rimo saro rido neio tere ro girobai. Taie ipi ato nou kowasoro urubia aise gihodowa gabo sapuwo to, nakara moro ato nou ro iato gimowapotai oweru ibo nou aboto etou

tanaro ro amadimo-ororosioi diro-ri Ierusarema sabowa ato.

³³ Taie nou ro nato gapusia ower a nakomu ibo, 'Nimo Ierusarema to nidiai-dumo. Imese Urubia Kiauri Dubu to Na-gapoi nedi dubu ro amadimo-ohiai-ri Godi ra urubia ra turituri urubia ro daro Mose sabi kitamudiro urubia ro. Neio ro namadimo-orobai-ri ina nato amadimu-utura-ri nou aboto ibo, "Nedi dubu ro modobo ie kesuai aboto", neio ro nou iato daimodaimo rubi aboto amadima-aiwai-ri,

³⁴ taie ina nedi dubu ro neio ro nou amadime-emasosowado-ri, gase to amadima-amoruti-ri, nou kerei to amadime-epesuti-ri ubauba mino to, ina iato amadimo-opia-ri. Kaupoti netewa teibo saiki teibo namado-oroporeai-ri ina ata saiki ato nou bobo rido amadi-eribua-ri keremiro ama-owea-ri.'

Iemisi ra Ioane ra Iesu a-gararatoro-rido auna masiro imidai ri

³⁵ Iemisi ra Ioane ra neitiro Sebedi mere teibo ie, ata tau Iesu aboto nato gou-rido. Neitiro ro ibo, 'Kitamudiro dubu, neitiro ubi tanaro oro ro kosioidiro modobo ra?'

³⁶ Taie neitiro Iesu ro ibo gimowameai-ma, 'Nitiro etona ubi emedea-diodo mo ro kimisioidiro-ma aboto?'

³⁷ Ina neitiro ro Iesu ibo gemowameai-rido, 'Oro auna gabamani to nama-omidiro-ri, oro ro nama-iwaboi-ri urubia sirio, neitiro ubi ie ata oro tumodi sapuwo ato komidiro ina ata oro pere sapuwo ato komidiro ina nedi gabamani ro neibi ro namabimi-iauri-ri atu se oro mutu.'

³⁸ Neitiro Iesu ro ibo gimowameai-ma, 'Etou nakomu ri araratoro-diodo nitiro umoro pua! Mo ro edio temeteme ro nama-iwia-ri nitiro ro idaibo temeteme kiwia ato nitiro aboudo modobo ra? Mo anama-odoro-ri auna ia mibo to idaibo sosoro ie mo obo to namadimo-owarumia-ri. Ina nitiro aboudo modobo ra idaibo sosoro nitiro obo maumo to kiwarumia-ma?'

³⁹ Ina neitiro ro ibo, 'Io neitiro ro kisioidiro modobo ie.'

Taie Iesu ro ina nato gimowameai-ma ibo, 'Nitiro idaibo sosoro temeteme amadi-iwia-ri mo ro beda sosoro temeteme nama-iwia-ri, ina nitiro ibose ie obo maumo to amadimi-iwarumia-mari mo beda sosoro to namadimo-owarumia-ri.'

⁴⁰ Mo ro irapoi-mari pua etu tiro ro amadi-imidiro-ri edio bobo teibo ro nato, Godi nakara se nou ro ama-iwomi-mari.'

⁴¹ Ina arua kowasoro urubia na-girowidiro-rimo idaibo owera Iemisi ra Ioane ra aboudo neio auna serawo ro girobai neitiro aboto.

⁴² Taie Iesu ro imese kowasoro urubia atu moro to iato gidabuai neitiro ia mutu iato nou ro nato gimowauti ibo, 'Daimodaimo duriomoro ato neio eputa urubia mutu e, neio ro woko urubia auna kimagege ie ina nio umoro ie ibo idaibo sosoro urubia kiwabo neio auna ubi ie auna dubu to kararasoro, amura to kararasoro woko urubia se kimasouti, nou ubi tanaro se kisioidiro. Ibose neio iedi gabamani eputa urubia ro auna ubi ie urubia neio ro idaibo mino to kiworohuti.'

⁴³ Kaupoti nio ro idaibo sosoro tanaro isioidiro ate!'

Nou ro ibo, 'Nio ata ubi na-owamo auna masiro kimidai aboto nou modobo ie urubia woko kemesioidiro aboto.

⁴⁴ Nio ata ubi na-owamo auna dubu to kararasoro aboto nou modobo ie urubia sowake koroho.

⁴⁵ Mo Imese Urubia Kiauri Dubu to na-napoi-ro mo nou ri ou pua mo urubia ro woko emesioidiro ri, urubia ro tu tobotobo oworohuti ri mo auna dubu to ararasoro ri. Mo a-nou-ro urubia woko imesioidiro rie. Mo noudo nou-ro keremiro aiwai ri sirio urubia iapopo ri ubauba aboudo.'

Iesu ro gowai idomari pogo dubu meana

⁴⁶ Iesu nou kowasoro urubia mutu Ieriko sabowa to ou rie neibi auna ia dubu patu ro gibodoro-ibirimo saro rido. Neio iedi sabowa ro na-gemeserai-rimo ata pogo dubu urubia nou ro iwarotiti gabo bara ato gomidiro nou Timeasi mere ie masiro Batimeasi.

⁴⁷ Nou ro na-girowai ibo ata Nasareti sabowa dubu masiro Iesu nou tou-die neito Ieriko sabowa to, iato nou ro Iesu nato gorumai ibo, 'Ei! Iesu, mo umoro ie oro Godi ro kohodowa dubu e, mo natonato demati-ro!'

⁴⁸ Ina iedi pogo dubu ro idaibo owera na-garo sirio urubia ro a-gemadohuti-rimo ibo, 'Oro deremasiai! Nou aboto auna se giaiauti!'

Kaupoti iedi pogo dubu ro nou eremasio pua kiaiauti. Nou neio ro pupuwo to gemowaititi-rimo nou ro ina ibo, 'Iesu, oro Godi ro kohodowa dubu e, mo dowarebai-ro! Iesu oro

Godi ro kohodowa dubu e, mo dowarebai-ro, mo natonato demati-ro!’

⁴⁹ Taie Iesu ro iedi oweru ro na-girowai nou aise gotobowa nou ro ibo, ‘Demowapotai-mo iedi dubu ro neito mou-ro mo aboto.’

Taie neio ro nou iato gorumai-rimo samo to ou ri Iesu aboto, neio ro ibo, ‘Oro deribua-ro Iesu ro taramairi-die nou aboto ou ri.’

⁵⁰ Taie iedi idomari pogo dubu ro na-geribidiro nou iedi obotama to na-garatimaidiro aise gebedidiro taie Iesu aboto imese gaberai-ro.

⁵¹ Nou Iesu ro nato gemodowa ibo, ‘Mo ro etou tanaro nama-osioidiro-ri oro aboto?’

Taie iedi pogo dubu ro ibo, ‘Kitamudiro dubu mo idomari teibo meana demowai-ro. Mo ubi ie mea se kirarowo aboto.’

⁵² Iesu ro ibo, ‘Oro idomari teibo meana ta-woi-do mabu oro kimibiria towamo mo aboto.’

Taie iedi tau ro nato nou gabo ato na-gou namabu patu nou ro mea se giauri. Iedi pogo dubu ro orowameai pua simara sabowa to Iesu beda moro to gou nou aise garadabuai nou aboto.

11

Iesu Ierusarema sabowa to na-godoro

¹ Iesu nou kowasoro urubia mutu Ierusarema sabowa aupi aupi na-gemowaititi-birimo neibi ro Betepage ra Betani ra nedi sabowa teibo ro neito gorowateai-birimo keba se, iedi sabowa teibo ro iato iamo-ma Oribi Podo gomo ato. Taie

ioudo Iesu ro netewa teibo kowasoro dubu teibo nou ro nato gimeriai-ma ata sabowa to.

² Nou ro ibo gitomudiro-ma, 'Nitiro ito ba-dou-do iedi sabowa ro na-owamo-die ito namado-orowateai-ri nitiro ro amado-owea-ri doniki kainai nama-otoi-ri. Iedi doniki ro ata ro nou gimini ohu ato omidiro pua orio na ie. Nitiro ro kemasaubiai amado-owea-ri ba-demopurитай-rido neito ba-demowou-rido mo.

³ Ina ata ro nama-imodowa-mari ibo, "etou ri emopurитай-do?" Ina ibo ba-demowameai-do, "O Abera Naramu ubi ie nou ro koworohuti aboto ina nou ro amadi-owameai-ri neito nio aboto."'

⁴ Taie iedi oweru ro kowasoro dubu teibo ro na-girowidiro-rido iato neitiro imese gaimai-rido iedi sabowa ro neito. Neitiro ro iedi doniki ro iato gowea-rido kemasaubiai na-gotoi moto magere damo gomo ato. Iedi moto ro gabo bara ato gotoi. Taie neitiro ro iedi doniki ro hodo aise gemopurитай-rido,

⁵ iato arua urubia na-gorowotoi neio ro ibo, 'Ei nitiro ro etou tanaro osioidiro-do? Etou mabu ato emopurитай-do iedi doniki ro?'

⁶ Neitiro Iesu ro beda sosoro gimowapotai-ma kutura oweru neitiro idaibo sosoro oweru to garo-rido iedi urubia neio aboto, 'Abera Naramu ubi ie nedi doniki kainai ro.'

Taie iedi urubia ro neio ro ibo, 'Modobo ie ba-demowou-do!'

⁷ Neitiro ro iedi doniki kainai ro iato imese gowou-rido Iesu aboto. Neitiro simara obotama doniki gimini ohu ato aise gisouti-rido ina Iesu imese gomi doniki gimini ohu ato.

⁸ Iesu doniki gimini ohu to beda tau ato giriratai urubia sirio ro obotama se

gemosouti-rimo, ina arua urubia ota atemo kainakaina na-giasio-rimo iato gemosouti-rimo gabo ato Iesu kou moro ie doniki to.

⁹ Arua urubia keba to na-gou-rimo, arua saro rudo, Iesu isana turi ato neio a-gemowabu-rimo kamade ri noudo giaiauti-rimo 'Godi imese meana ia ie! Godi ro oro korosa ta-gomia, Abera Naramu pupuwo mutu oro nou se tou-die, korosa towamo oro abato. Abera Naramu ro Morobise Kohodowa Dubu to na-gapoi oro nou se ie. Korosa ama-owamotiti-ri oro abato.

¹⁰ Abera Naramu ro nou edi korosa ro na-gomia oro ro nama-iauri-ri, keba se Deibidi ro beda sosoro to giauri. Godi imese meana ia ie! Auna se ba-demowabutiti-mo!'

¹¹ Iesu Ierusarema sabowa to na-gorowateai nou aise gemobodiai Tarena Moto to iato idomari se goworohuti. Kaupoti saiki ta-geretei nou modobo pua iato korobu. Ina ioudo nou aise gorowameai-ro 12 kowasoro urubia mutu Betani sabowa to.

Pigi ota Iesu ro gatodai

¹² Ata kowaroho Iesu kowasoro urubia mutu Betani sabowa na-gemeserai-rimo neio imese gou-rimo Ierusarema sabowa to. Ipi ato Iesu sogoi ro nato gorobai,

¹³ muso rido neido girarowea pigi ota na-gotoi-ro puara patupatu iopu tato. Nou neido na-gosiomai ota iopu imawotidiro ri kaupoti iopu iroridiro pua egea se giosora, pigi ota nou simara kororuti tau ro orobai pua.

¹⁴ Taie nou ro pigi ota owera to nato gemowapotai, 'Ido oro aboudo iopu iorari pua!'

Nedi owera nou ro na-gutura kowasoro urubia ro ta-gemorowai-rimo.

Iesu tarena moto ato namabu gimagagawado

¹⁵ Iesu kowasoro urubia mutu Ierusarema sabowa to na-gorowameai-rimo nou aise gemobodiai Tarena Moto to. Nou ro iato urubia sirio se giwia namabu mani to na-gorowamade-rimo, arua namabu a-geremahudirio-rimo. Nou ro iedi urubia ro ioudo aise gibodoidiro-ro. Urubia ibose ti-gorowotoi mani geremahudirio-rimo. Muso urubia neio mani na-giwou-rimo Iu urubia mani mutu geremahudirio-rimo. Urubia sirio dumu pawa ioudo ta-gimade-rimo mani to, imatowo na ie Godi aboto. Iedi urubia ro na-gorowotoi Iesu ro iato giapirio, teiboro sirio nou ro aise giatutubo dumu pawa edi teiboro ohu ato na-gorowomidiro ibose to giatutubo.

¹⁶ Urubia sitoa namabu na-giworoho-rimo Tarena Moto gomo ato Iesu ro neio gabo aise giwasiouti.

¹⁷ Taie iedi urubia sirio ro iato na-gorowotoi nou ro nato gimowapotai ibo, "Tarena Buka ato tiamo idaibo sosoro owera, *"Mo moto imese duriomoro urubia kararatoro moto ie"*, kaupoti nio ro abora *"piro dubu moto to"* apoi-dumo.'

¹⁸ Mose sabi kitamudiro urubia daro urubia ra Godi ra turituri rubi neio ro Iesu na-gemorowai-rimo neio ubauba kimaragoidiro ta-giwia-rimo. Taie neio ro Iesu kopia gabo nato gemosora-rimo mabu neio tere ro giwati urubia nou ro beda mino to gitamudiro, ina iedi urubia sirio ro na-gorowotoi Iesu beda sosoro owera to

gitamudiro neio ro kamade to gomidai-rimo.
Neio ro ibo, 'Idaibo sosoro kitamudiro keba se
nimo ro owea pua!'

¹⁹ Taie iato Iesu kowasoro urubia mutu adimo
ato gosuruwo-rimo Ierusarema sabowa rido ata
moro to ioudo gou-rimo.

Pigi ota rido Iesu ro maumo tanaro gitamudiro

²⁰ Ata kowaroho Iesu nou kowasoro urubia
mutu na-gorowameai-rimo Ierusarema sabowa
to ipi ato neio ro nato gowea-rimo pigi ota
na-gotoi puara tato, Iesu owera huhuame ro edi
na gorobai sipi rido durupi agagi imese
ta-garawo.

²¹ Pita ro na-gowea iedi ota ro nou nato
gimagareai ina Iesu aboto nato gutura ibo,
'Kitamudiro dubu a-imaragoidiro-ra, oro ro
ma-dowea iedi pigi ota ro dutu oro owera
huhuame ro gorobai, iedi ota ro ta-garawo!'

²² Ina Iesu ro Pita ibo gemowameai, 'Nio ro
ba-dimibiria-mo Godi aboudo imese tanaro patu
kisioidiro modobo ie.

²³ Gare neito ma-diedea-rimo, nio morobise
owera nama-imowapotai-ri. Nedi podo ro
na-otoi-die oro nou ato kutura ato ibo, "Podo oro
dodori obo to!" Oro abato ataata kimaragoidiro
iamo tato kimibiria kawakawa na-owamo ina
etou nakomu ri araratoro Godi aboto io
kororosiodiro ie.

²⁴ Ina nou rie oro mo ro a-nemowapotai
modobo ie oro karatoro tau ato kimibiria mutu
ibo, "Mo ro edi wisa ro morobise to
anama-owea-ri," taie, oro ro aise kowea ie.

²⁵⁻²⁶ Ibose oro karatoro ato oro na-imagareai
ibo oro ata mutu serawo teremowomidiro-do

oro ro modobo ie morobise woki kememati nou
edi ubauba ro oro aboto na-gosioidiro. Oro ro
iedi tanaro kosioidiro ato, ina ibose ie oro Abera
Adiri ato na-omidiro-die nou ro idaibo tanaro
kosioidiro ie oro edi ubauba ro nou ro
kematopeamuti ie.'

*Awawo urubia ro Iesu a-gemodowa-rimo nou
korosa boido gowai*

²⁷ Iesu nou kowasoro urubia mutu ina
Ierusarema sabowa to na-gorowameai-rimo nou
Tarena Moto gomo ato iato goroho. Taie turituri
urubia, Mose sabi kitamudiro urubia daro
duriomoro kiauri urubia Iesu aboto nato
gou-rimo.

²⁸ Neio ro nato gemodowa-rimo nou, 'Iesu oro
boido gowai iedi pupuwo korosa ro? Oro etu ro
gomia-ro iedi korosa ro?'

²⁹ Iesu ro iedi urubia ro ibo gimowameai, 'Nio
ro keba se mo edi karatoro owera ro
ba-demowameai-rimo, ina nio ido nato
nama-imowapotai-ri ibo mo korosa etu aboudo
nomidai-ro.

³⁰ Mo abora ma-demowapotai-rimo Ioane obo
to urubia na-iwarumiautiti iedi korosa ro boido
gowai-ro? Godi aboudo a-gomidai ra o urubia
aboudo ra? Mo abora ma-demowapotai-rimo!'

³¹ Iedi karatoro owera neio ro na-girowai-rimo
neio nakara se owera to iato gororobai-rimo.
Neio ro ibo, 'Nimo ro ibo
namadime-emowameai-ri Ioane obo to
kiwarumiauti korosa Godi aboudo ie ina Iesu ro
ibo amadi-utura-ri, "ina mabu boira Ioane iedi
owera nio ro imibiria tato?"

³² Ina nimo ro ibo namadimu-utura-ri Ioane edi korosa ro urubia aboudo gomidai-ro ina iedi urubia ro na-orowotoi-die neio serawo amadimo-oi-ri nimo aboto.' Nedi awawo urubia ro urubia topira gebari tere gemati-rimo mabu imese sirio urubia neio umoro ie ibo Ioane nou Godi ipusu oweru dubu e.

³³ Taie iedi awawo urubia ro Iesu neito gemowameai-rimo, 'Nimo umoro pua.'

Iesu ro ina nato gutura neio aboto, 'Ina mo edi korosa ro boido nowai nio mo ro imowapotai-ri pua mabu mo edi karatoro oweru ro mo wisa mea se nio ro emowameai pua, marasio.'

12

Pari ubauba urubia ro emeaurititi-mo nou totomu e

¹ Iesu ro totomu imowautititi urubia kitamudiro sapuwo to. Ata tau ato nou ro totomu nato gimowauti ibo, 'Ata dubu ro gereipi pari nato gosoidiro. Nou ro kara to na-gemowagegeidiro taie turi ato nou ro bobo na-goboba, boroboro kupia kedea moro ie ohu ato gereipi sairo to kituti ato isi obo ito kisuputi ie. Ina ohu moto iato gididi pari kiauri moro ie.

Taie pari abera ro arua urubia se girobai nou pari emeauri na. Nou ro ibo, "Nedi pari ro mea mino to ba-demeauri-rimo nio aboto niapo, awawo namadimo-oi-ri arua iopu mo do ie, arua nio do ie", taie iedi dubu ro iato imese gaimai ata muso moro to, iato ibo irohotiti, ibo irohotiti

² iato iedi gereipi pari ro na-gemeserai-ro kumabo awawo ta-go-ri-rimo, iopu gumuni se gorowotoi. Nou iato gimaragoidiro ata dubu nou

ro aise gemeiriai iedi pari ro neito arua gereipi gumuni imade ri iwou ri nou aboto.

³ Kaupoti iedi dubu ro na-gorowateai-ro neio ro na-gowea-rimo na-gorobai-rimo ubauba mino to iato gado-rimo. Na-gado-rimo taie imese gotiodorai-rimo ata gereipi gumuni tato tu kawakawa gorowameai nou.

⁴ Iedi pari namutuna ro ina ata dubu iato gotiodorai nou na-gorowateai neio aboto iedi dubu ro neio ro korobai na-gado-rimo ubauba mino to eputa ti-gowakokobo-rimo. Neio ro nou aboto ata siripo tanaro gosioidiro-rimo. Iedi dubu ro na-gorowameai-ro, “O mo idaibo mino to noworohuti-dumo iedi urubia ro neio ro!”

⁵ Ina nou ro ata sowake dubu iato gemeiriai atu urubia aboto, nou na-gorowateai iedi pari kemeauri urubia ro nou aboto mea tanaro osioidiro pua neio ro aise gopia-rimo.

Ina iato iedi dubu ro nou ro sirio se iato gimerio sowake urubia. Pari kiauri urubia ro iedi urubia ro amia aise giesu-rimo arua ubauba mino to giado-rimo.

⁶ Pari namutuna ro urubia kimeirio to ta-giporeai, kaupoti ia ro geremeserai kemeiriai aboto nou ia simara mere, nou ubi mere ie. Nou ro iedi mere ro saro ia rido gotiodorai. Nou ro ibo, “Nedi urubia ro neio ro mo mere mea mino to amadimo-oworohuti-ri mabu nou mo ia mere ie.”

⁷ Taie urubia mere neido na-gemeiriai na-gorowateai nedi pari ro ito, iedi urubia ro na-gemeauri-rimo neio nakara se nato geremowauti-rimo nou neio ro na-gowea-rimo. Neio ro ibo, “Nou pari namutuna nou mere ro

ou-die nou emeiriai-die nou ro. Modobo pua nedi pari ro nou ro imese moro to kirahidimai, mesuai-rimo nedi mere ro, pari nimo do to nato ama-ararapoi-ri.”

⁸ Neio ro oweru to auna se aro pua, iedi mere ro na-gorobai-rimo, iato gopia-rimo nou pamo durupi pari rido aise geherai-rimo.’

⁹ Iesu ro neio nato gimowapotai, ‘Pari namutuna ro iato beda tanaro ama-osioi-ro? Nou ama-ou-ri iedi gereipi pari neito iedi urubia nou ro neio ama-iopiauti-ri ina iedi pari ro etio ra mea se kemeauri urubia neio aboto ama-iapoi-ri.

¹⁰⁻¹¹ Nio ro Godi edi Tarena Buka oweru ro a-ioputi-dumo ra? Io nio ro na-gioputi-rimo “Moto beda urubia ro gididi-rimo meamea posi se giosora-rimo ina mea ia posi neio ro a-gasoperai-rimo dorogora se gowatebetai-rimo, Godi ro na-gowea iedi posi ro nou ro ibo, ‘Nou modobo posi ie turi ato owotobowa na moto gebari koko poroporo nou ro ama-adiouti-ri.’ Nou ro beda oweru garo iedi posi ro na-gomidai-ro iato gowotobowa turi ato, nou ro mea tanaro gosioi-ro.” ’

¹² Iu awawo urubia umoro ta-goi-rimo ibo nedi totomu oweru ro Iesu ro na-gimowauti urubia pari ubauba se na-gemeauri-rimo nou sapuwo to, nou ro neio ia sapuwo to gimowauti. Taie neio na-giraroweauti-rimo urubia sirio se giauri-rimo, neio ubi ie Iesu orobai ri koto to owou ri, mabu neio tere ro giwati iato neio ro modobo pua urubia dubu patu ato korobai nou.

Iu eputa urubia ro Iesu iato aise gemeserai-rimo imese gou-rimo.

Takesi mani Roma gabamani aboto kiaiwo modobo ra

¹³ Arua Parasi urubia Herodi kowarebai urubia mutu Iu eputa urubia ro iato gimeriai-rimo Iesu aboto. Iu eputa urubia neio ubi ie Iesu ro ata ubauba ata osioidiro ri ina nou neito eremamuai rie.

¹⁴ Neio na-gou-rimo nou aboto nato gutura-rimo ibo, 'Kitamudiro dubu, nimo umoro ie oro morobise dubu e, urubia beda sosoro imaragoidiro-dumo oro sapuwo to, oro ata tere tato ie neio aboto. Imese beda mutu urubia sirio ra neio imese atu sosoro ie oro sosoro gabo ato, ibose oro kitamudiro Godi sapuwo to imese morobise ia kitamudiro iworohutiti. Tauo nimo ma-dimowapotai-ro, nimo ro takesi mani kiaremo Roma gabamani eputa dubu nou aboto, io modobo ra o modobo pua ra?'

¹⁵ Iesu keba se umoro ta-goi neio beda sosoro kimaragoidiro gimaragoidiro-rimo, taie nou ro nato gimowameai ibo, 'Mo nio ro etou mabu rido nowaibia-dioumo? Mani iopu neito ma-demowawea-rimo.'

¹⁶ Neio ro na-gemowarario-rimo, taie nou ro nato gimodowa, 'Nodio asaso ro etu asaso ro iateidiro masiro mutu?'

Taie neio ro ibo, 'Roma gabamani eputa dubu nou masiro Sisa nou asaso ro iateidiro masiro mutu.'

¹⁷ Taie Iesu ro nato gimowapotai ibo, 'Beda nakomu ra Sisa masiro mutu modobo ie Sisa

kemowameai, ina ibose Godi ro beda nakomu iaiwo-die modobo ie Godi kemowame.'

Neio ro na-girorowai-rimo edi owera ro Iesu aboudo kodurubo imese gorowotoi eputa se giweisorowado-rimo.

Pamo urubia kireribua kেমodowa owera ie

¹⁸ Iedi tau ro nato Sadusi urubia ta-gorowomidiro. Neio Iu urubia ie kaupoti neio a-imibiriatiti-mo karaburai ato nou imese moro to karaburai ie nou ina keremiro owea ri pua. Arua Sadusi urubia Iesu aboto iato gou-rimo kেমodowa owera mutu.

¹⁹ Neio ro ibo, 'Kitamudiro dubu, Mose ro na-gisioidiro titi idaibo sosoro ie, ata orobo ra mutu dubu merebusere tato karaburai ato, nou edi orobo garamu ro neama ro kewedea ie, ina nou ro merebusere kirasomai ato, nedi merebusere ro naramu masiro ato kirasomai ie, neama do pua nou ro kirasomai kawa kirasomai ie.'

²⁰ Neio ro ibo, '7 naminiramio ta-gorowomidiro, keba se naramu ro gedea orobo. Naramu dubu mutu na-imidirotiti-do taie naramu dubu iato aise garaburai, edio orobo ro nou ro mere besere tato gemeserai-ro, taie edio orobo ro ibo imidirotiti

²¹ ina turi dubu ro edi garamu iato gedea. Taie iato nou mutu ibo imidiro-do iato iedi turi dubu ro aise garaburai. Iedi orobo ro ina nou ro mere besere tato gemeserai-ro.

Ina atu sosoro tanaro ibose to gororosoidiro turi dubu abato edi na na-gai-ro nou abato,

²² edi orobo ro 7 naminiramio neio ro karemo to ti-goroporeai. Neio merebusere irasomo pua iedi orobo ro nou abato.

Iedi orobo ro ibo imidirotiti womu tato ti-garaburai. Iedi kaupoti orobo ro 7 naminiramio neio ro garemo-rimo.

²³ Ina Godi ro pamo rido nama-iwoubua-ri etu orobo to ama-ararapoi-ri, keba dubu orobo ra o neama do ra o etu do ra? Mabu 7 urubia ro garemo-rimo iedi kaupoti orobo ro.'

²⁴ Iesu ro neio iedi owera ro masawe to gimasiai. Nou ro ibo, 'Nio etu ri aradoruti-dumo sirio tau to? O mabu nou ri ra nio umoro pua ra Godi edi tarena buka owera ro? Neido a-waradoruti-dumo ra nio? Nio umoro pua Godi nou urubia dubu e imese pupuwo ia ie.

²⁵ Urubia na-orowaburo-dumo neio Eredea Dubu edi sowake urio ro neio sosoro ama-irowomidiro-ri. Urubia erere se ama-irowomidiro-ri kararemo pua ie iato. Godi edi suwake urio na-orowomidiro Adiri sabowa ato neio sosoro ama-irowimidiro-ri.

²⁶ Nio imese umoro ie ina keremoputi ie Godi edi tarena buka ro urubia pamo rido amadimi-irurubua-ri keremiro to. Godi ro ta-gutura urubia pamo rido kineribua sapuwo to Mose ro edi owera na-gisoidiro nio ro a-geremoputi-dumo ra? Ibo iamo era ota ato na-ireware-ro Godi ro ibo nato gutura Mose aboto *Aberaham, Aisaki, Iakobo mo neibi ro ti-nemowabutiti-bimo.*

²⁷ Neibi ta-gorowaburo-birimo ina abora neibi keremiro ie Adiri sabowa ato. Godi abora temowabu-bimo. Urubia abora na-orowomidiro,

urubia na-gorowaburo-rimo, neio atu se nou ro tiauri-die.

Nio Sadusi urubia auna ia se aradoruti-dumo.'

Nedi tanaro teibo ro auna tanaro teibo ie

²⁸ Mose sabi kitamudiro dubu kaupoti Iesu aboto iato gou-ro nou ro ta-girorowai Iesu Sadusi urubia mutu oweru saro na-geremowasiouti-rimo, nou ro ta-gemewidiro-ro Iesu ro neio karatoro oweru wisa mea se gimowameai. Taie nou karatoro oweru mutu nato gou-ro nou ro ibo, 'Tarena Buka ato na-owamo beda tanaro ra imese auna ia tanaro?'

²⁹ 'Arua tanaro neio sopu to iamo-die' taie Iesu ro iedi dubu ro nato gemowameai ibo, '*Isiraere urubia neito dirowidiro-rimo! Abera naramu Godi nimo ro na-nemowabu-dumo nou nakara ia se nou se Abera naramu ata tato ie.*

³⁰ *Godi nirimagare kemati modobo ie morobise giropu to, morobise ubi to, morobise kimaragoidiro to, morobise pupuwo to, imese nou aboto kiaiwai modobo ie.*

³¹ Ata auna tanaro ibo ie *oro modobo ie arua urubia nirimagare kimati oro beda sosoro eremati nakara se oro ro idaibo nirimagare kowawuti modobo ie arua urubia aboto.* Nedi tanaro teibo ro imese auna ia tanaro teibo ie.'

³² Taie Mose sabi kitamudiro dubu ro na-gemororowai nou ro ibo, 'Kitamudiro dubu, io oro ro modobo oweru aro-die, oro ro morobise utura-die idaibo Godi kaupoti nou se ie.

³³ Nimo ro modobo ie Godi giropu to nirimagare kemati, kimaragoidiro to, ibose morobise pupuwo to kisioidiro. Idaro urubia dubu modobo ie arua rubi nirimagare kimati

nou beda sosoro eremati nakara se. Nedi tanaro teibo ro morobise ie neitiro auna ia tanaro teibo ie. Arua tanaro na-iamo idaibo tumu na kimatowo Godi aboto io neio sopu to iamo-die.'

³⁴ Iesu ro iedi dubu ro na-geibimai nou ro wisa mea mino to gemowameai nou ro ibo 'Oro ro aupise ta-emosiomai Godi edi kara goro ro neito kodoro aboto.'

Taie Iesu aboto modobo pua ina ata dubu ata kou karatoro oweru mutu.

Godi ro kohodowa dubu Deibidi Abera naramu e

³⁵ Iesu nou Tarena Moto ato gitamudiro urubia sirio neio ta-goroiti taie nou ro neio nato gimodowa ibo, 'Mabu boira Mose sabi kitamudiro urubia ro neio ibo na-itamudiro-dumo Godi kohodowa dubu nou gu Deibidi aboudo orobu-die?'

³⁶ Tarena Urio ro Deibidi kutura oweru umoro ta-gowai, Deibidi ro ibo, *Godi ro ta-gutura mo Abera naramu aboto, "Mo tumodi sapuwo ato oro ba-domidiro womu tato oro nasa rubi mo ro nama-itaumai-ri oro sairo mabu ato."*

³⁷ Deibidi ia ro ibose ta-wasoro Godi kohodowa dubu nou Abera naramu to. Ina mabu boira arua rubi ro ibo na-warodumo "Godi kohodowa dubu nou Deibidi gu aboudo orobu-die?" '

Urubia sirio na-gorowomidiro nou kitamudiro tau ato neio imese auna ia kamade ro giwati.

Mose sabi kitamudiro urubia Iesu ro neio giwauti

³⁸ Neio ina Iesu ro iato gitamudiro, 'Umoro umoro se nio keremowotoi mutu Mose sabi kitamudiro urubia abeamio tanaro kitamudiro ata sosoro ie, neio tanaro ibodoro mamo, neio ibose ie auna ubi ie meamea namabu to

keremeduti urubia ro imowabu ri. Awawo urubia to kararasoro neio auna ubi ie, arua urubia ro ibo aro ri “auna dubu dematateai-mo tou-die.” Neio ubi ie idaibo tanaro kororosioidiro ohona kimade moro ato.

³⁹ Ibose neio auna ubi ie meamea komidiro moro kimaberewado karadabu moto ato io ubauba komidiro moro dorogora se urubia do ie. Neio ubi ie urubia ro meamea keta se kimosouti orowomititi na.

⁴⁰ Ibose nedi urubia ro neio garamio auna kiaserai ie namabu aboto. Neio Godi aboto kararatoro tau ato tututu kararatoro owera nou karowado ie urubia ro imowabu ri.

Nedi urubia ro idaibo na-isioidiro-dumo Godi ro neio timerebidiro-die ubauba temeteme saiki ata amadimo-owea-ri.’

Garamu orobo auna ia mani gaiwai Godi aboto

⁴¹ Iesu Tarena Moto ato na-gomidiro Godi sapuwo to na-iaiwoititi-dumo mani iedi mani bokose ro nou gomo ato gomidiro. Taie urubia na-godouti-rimo Tarena Moto to Iesu ro urubia se giauri neio nirimagare mani na-gibiti-rimo iedi bokose goro neito. Namabu sirio urubia ro kainakaina mani iaremo pua iedi bokose goro ro neito.

⁴² Taie iato namabu tato garamu abere ro godoro-ro nou ro netewa teibo garegare mani iopu teibo nou se gibitidiro-ma. Iedi mani iopu teibo ro auna mani iopu teibo pua, beda sosoro ra netewa teibo toea teibo nou gibitidiro-ma.

⁴³ Iesu ro ta-gowea iedi garamu orobo ro taie nou kowasoro urubia iato girumai, ‘Ma-dou-rimo neito mo aboto. Iedi garamu abere ta-wodoro-ro neito nou ro netewa teibo

toea teibo nou ibitidiro-ma nedi bokose ro neito. Nou mo ro na-nowea edi toea teibo na-iworohuti-ma nou ro imese momuo se aise iwou-madie. Ata nakomu ata nou ro emeserai pua moto goro ato. Nio mo ro morobise ower a nimowapotai, nedi garamu orobo ro auna ia mani iedea bokose goro to, ibo pua arua rubi idaibo sosoro mani na-iaiwo-dumo.

⁴⁴ Nio ro ta-iauri-mo awawo mani urubia mani na-iaremo-dumo, kaupoti neio mani iporewado pua kiaremo to, maumo nosonoso tirobu esepaesepa tirobu. Kaupoti nedi orobo ro nou ro ata nakomu ata emeserai pua, imese momuo se tiaiwai-die. Nedi orobo ro namabu tato orobo ie, nou edi na mani iopu ro na-waiwidiro-titi ohona imade na nou ro imese momuo se tiedea.'

13

Aborabora tanaro amadimo-ororosioi-diro-ri womu tau ato

¹ Iesu Tarena Moto na-gemeserai ata kowasoro dubu ro nato gutura. Nou ro ibo, 'Kitamudiro dubu ma-diwia nedi nadi moto ro meana ia se gisioidiro-rimo!'

² Taie Iesu na-girarowea nou ro ibo, 'Nio ro tiauri-dumo iedi moto gebarigebari ro na-worowotoi-die, ido orowotoi-ri pua amadime-eresebuti-ri ata moto ata masiro ararasoro-ri pua.'

³ Ata tau Iesu Oribi Podo ohu ato na-gomidiro Tarena Moto sapuwo ato gotoi-ro. Taie Pita Iemisi Ioane daro Enduru neibi nou aboto iato gou-birimo nakara se. Neibi ro nou nato gemodowa-birimo,

⁴ ‘Iesu neibi ma-dimowapotai-biro, beda tau
ato ra idaibo sosoro tanaro
namadimo-ororosioi-di-ro-ri? Etou tanaro
anama-imowawe-ri oro ro nimo umoro koi
aboto ibo womu tau aupise ie?’

⁵ Iesu ro ibo gimowameai-bi, ‘Mea se
ba-deremowotoi-bimo keremododiai modobo ie,
oro ata dubu ro kegediai modobo pua,

⁶ mabu arua urubia tou-di-mo, mo to
amadima-aratigi-ri. Neio ro amadima-aro-ri ibo,
“Mo Iesu nou se ie.” Neio ro urubia sirio sairo
rudo amadimu-udidiro-ri.

⁷ Ina ibose nedi tau ro nato nio ro boso owera
amadimi-irowidiro-ri amia duriomoro ato
namadimo-ororosioi-di-ro-ri, kaupoti nio tere oi
ate nato. Iedi tanaro ro na-wororosioi-di-ro-dumo
nio ibo imaragoidiro ate womu tau to
nereredea-di-mo.

⁸ Ata duriomoro ata duriomoro mutu neitiro
boso keremedea ie. Ibose ata sabowa ata
sabowa mutu karado ie. Ibose sopu momuruwo
arua duriomoro ato amadimi-iauri-ri. Ibose ie
iedi tau ro nato erere duriomoro ato sogoi
ama-araremo-ri ohona tato amadimo-oi-ri
urubia sogoi ro ama-iwati-ri. Iedi tanaro ro
namadimo-ororosioi-di-ro-ri duriomoro gebari
idaibo sosoro ie urubia orobo mere temeteme
namadi-emowatumuti-ri keba se nedi tanaro ro
neio ro amadimo-ororosioi-di-ro-ri saro rido mibo
sirio iato amadime-ereredea-ri.

⁹ Nio modobo ie nakara se keremododiai
aboto mabu iedi tau ro nato urubia ro nio
amadimi-i-robo-ri, kerei to amadimi-ipesuti-ri
karadabu moto ato, koto to amadimi-iworoho-ri
gabamani sosoro gabo ato
amadimi-iwotoburio-ri mo sapuwo to.

Ibose nio ro amadimo-orowauti-ri mea oweramo sapuwo to. Nedi tanaro ro nou ri amadimo-ororosioidiro-ri nio aboto mabu nio mo kimibiria urubia ie.

¹⁰ Kaupoti nedi tanaro ro ido ama-ororosioidiro-ri nio aboto, tau keba se mea oweramo sapuwo to imese ama-orobodorouti-ri imese duriomoro gabogabo, owera erere bato iamo.

¹¹ Ina nio gabamani ro kiobai ato koto aboto nio karo oweraboto imaragoidiro mamo, nio Tarena Urío ro kitamudiro ie beda owerato karo ra.

¹² Ibose naramu dubu ro saiki ata simara neama ama-apoi-ri arua urubia aboto opia ri. Mabira ibose nou simara neama ama-apoi-ri arua urubia aboto opia ri. Ibose abeamio neio simara merebusere amadimi-iasouti-ri arua urubia aboto iopiauti ri. Merebusere ro atu sosoro tanaro amadimi-isioidiro-ri simara mamio abeamio aboto.

¹³ Urubia sirio ro nio masawe amadimi-iwia-ri mabu mo edi ubi tanaro ro nio ro tisioidiro-dumo.

Kaupoti womu tau nama-orobai-ri beda urubia ro iwotoi-dumo koko se neio ro womu tato womu tato keremiro amadimo-owea-ri.'

¹⁴ Iesu ro ibo, 'Nio ro amadimo-owea-ri ata nakomu iedi ubauba ia nakomu ro nou ro Tarena Moto ama-owaititi-ri ubauba. Nio ro namadimo-owea-ri nedi ubauba nakomu ro simara moro ato otoi-ri pua modobo pua nedi moro ro nato kotoi. (Oro etu ro ioputi nedi oweraro modobo ie oro ro maumo mea se umoro koi.) Iedi tau ro nato beda urubia ro

orowomidiro Iudia ato neio modobo ie korowodau podo duriomoro to.

¹⁵ Etu ra moto tamu ato nama-omidiro-ri nou modobo pua moto goro to karatea namabu ata omidai ri, modobo ie nou aise kodau.

¹⁶ Beda mere ra pari to nama-amedei-ri, modobo pua moto to korowameai obotama komidai aboto, modobo ie nou pari rudo aise kodau.

¹⁷ Iedi tau ro nato niro ra mutu mamio ibose bamuai mutu mamio neio beda ito amadimo-orowati-ri? Nirimagare babio tanaro patu iedi mamio ro neio sapuwo to imese koko ia se ama-iamo-ri.

¹⁸ Modobo pua nedi tanaro ro daroho tau ato kororosioidiro nou mabu ato modobo ie Godi kararatoro aboto.

¹⁹ Mabu iedi tau ro nato auna ia ubauba ro ama-ererede-ri tanaro patu imese ubauba ro ama-irobai-ri, imese ubauba ia tau ro ama-owamo-ri temeteme mutu. Keba se Godi ro duriomoro beda tau ato gosioidiro womu tato abora idaibo tanaro ata osioidiro pua abora ia se ama-ororosioidiro-ri, ina idaibo sosoro tanaro ata ororosioidiro-ri pua ido.

²⁰ Iedi ubauba tau ro nato Abera naramu ro saiki komukere ama-owai-ri, mabu nou simara urubia ama-imaragoidiro-ri. Godi ro saiki komukere kimowai tato rasiri ata dubu ata omidiro-ri pua, imese urubia pamo kawakawa ie.

²¹ Iedi tau ro nato nio ata dubu ro ama-imowapotai-ri ibo "Iesu nou e! Godi ro kohodowa dubu nou e!" Nio ata dubu ro ibose ama-imowapotai-ri ibo "Urubia dubu nou se ie,

nou ubi tanaro disioidiro-mo!" Kaupoti iedi
dubu ro nou oweru imibiria ate

²² mabu karasaubuti urubia amadidimo-ou-ri
neio ro awawo korosa tanaro
amadimi-isioidiro-ri. Arua ro amadima-aro-ri
ibo "Mo Godi kohodowa dubu nou se ie." Ina
aru ro ibo "Mo Godi ipusu oweru
kemoworohuti dubu e." Kaupoti neio oweru
imibiria ate, karasaubuti oweru
namadima-aro-ri. Neio neio
amadimi-isioidiro-ri nedi tanaro ro mabu neio
ubi ie Godi edi urubia ro neio ro iwateai ri
mea gabo rido,

²³ ina noudo ie nio modobo ie kiraroweauti.
Mabu nio mo ro keba se ta-nimowautiti nedi
tanaro ro nou sapuwo to ido
amadimo-ororosioidiro-ri.

²⁴ Iedi tau ro nato duriomoro gebari ro iedi
iona kio ro nou temeteme ama-waubere-ri. Saiki
pina nato ama-iasoperai-ri duwoduwo ro
ama-ahidimai-ri, sogomi idaibo sosoro
na-niauri-dumo beneniobenenio idaibo sosoro
otoi-ri pua,

²⁵ kiboni toboro rudo amadidima-araubuti-ri.
Namabu patu toboro ato na-iamo
amadimo-orowararioidiro-ri.

²⁶ Tuturu to pua nio ro iato amadimo-owea-ri
Imese Urubia Kiauri Dubu tema ohu rudo mea
ia sosoro namadi-orowapotai-ri, nou auna ia
pupuwo mutu amadi-ou-ri.

²⁷ Sowake koroho urio nou ro ama-imerio-ri
duriomoro gabogabo to, neio ro
amadimi-idabuti-ri edi urubia gihodowa keba se
kaupoti moro to.

²⁸ Dewao ota ro io nimo umoro
ti-niwaititi-dumo. Neio puara korobiritai ato

nimo umoro koi ie ibo saiki ama-otobowa-ri. Ibose orio puara na-isuwoduti-dumo bunio, gope mutu nimo umoro koi ie ibo surama aupise ie.

²⁹ Nio ro namadimi-iauri-ri ata ata tanaro namadimo-ororosioi diro-ri nio umoro nato ba-doi-mo Imese Urubia Kiauri Dubu nou korowameai musomuso se owamo pua.

³⁰ Urubia abora na-orowomidiro nedi duriomoro nato, nedi tanaro ro neio abato amadimo-ororosioi diro-ri.

³¹ Nedi duriomoro gebari ro toboro, sopu imese sirio namabu patu neio imese amadima-araseperai-ri, kaupoti mo beda owera naro araraseperai-ri pua ata ro ibose to ama-owamotiti-ri.

³² Nodi saiki ro Godi kohodowa dubu namadi-emeiriai-ri neito urubia sirio umoro oi-ri pua, nou ia mere dubu, Godi sowake urio sirio neio ibose ata umoro tato ie, Abera nakara umoro ie mo korowameai tau.

³³ Ina nio kiraroweauti modobo ie, umoro umoro se gi-orowomidiro-ro mabu nio umoro pua mo korowameai tau.

Iedi tau ro namadi-apimaidiro-ri nio umoro pua.

³⁴ Nou idaibo mino ie ata dubu ata sabowa to na-wou, tuturu tau to nama-omidiro-ri iato ata dubu nou ro kohodowa ie nou moto emeauri na. Urubia nou ro kimasouti ie beda sosoro woko amadime-emesioi diro-ri. Ata dubu aboto kutura ie “mo edi na nou ba-demesioi diro-ro.” Ata aboto kutura ie “oro ro magere ba-demotoi, oro modobo ie aise kirarowo.”

³⁵ Nio umoro pua moto abera korowameai etu umoro ra adimo ato, duwo turi ato, omona kakaba owera ato o kowaroho duwoduwo ato.

³⁶ Nio norou kirobu moro ato kiatuamo modobo pua.

³⁷ Nio mo ro ta-nimowauti keba se norou tato se kirarowo modobo ie.'

14

Iesu eputa urubia ro kopia gabo gemodobowauti-rimo

¹ Iedi tau ro neido netewa teibo saiki ro geremeserai-rido Isiraere urubia neio soriomu teibo kisioidiro-ma aboto. Isiraere urubia Godi ro na-gimasaudai masiro neio ro asoro-dumo ibo Kimasaudai Soriomu. Ata soriomu neio ro na-isioidirotiti-mo masiro owamo ibo Patapata Beredi Kaupai tato Soriomu. Turituri urubia neio awawo urubia, Mose sabi kitamudiro urubia neio ro iato gabo gemodobowauti-rimo Iesu kopia aboto. Neio ro ibo, 'Iesu kopia aboto piro se beda mino to namadimo-orobai-ri?'

² Kaupoti nimo ro modobo pua soriomu teibo tau ato korobai urubia sirio idomari gabo ato mabu neio auna serawo koi ie ibose nimo neio ro iadoni-dumo.'

Ata orobo ro mea nibo dehoru gemasia Iesu eputa ato

³ Iesu Betani sabowa ato Saimoni moto ato gomidiro adimo dokou iato gouho nou moto ato. Nedi dubu ro keba se katio ta-goworohuti.

Iesu iato na-gomidiro ata orobo nato gou-ro nou aboto botoni se gorobidiro-ro, iedi botoni ro nato a-gomidiro mea nibo dehoru, auna mani dehoru ie. Taie iedi orobo ro nou ro iedi dehoru ro mutuge na-gaubai Iesu eputa ato nato gemasia.

⁴ Arua urubia iato na-gorowomidiro neio ro na-gowea-rimo nou ro edi tanaro ro na-gosioidiro neio serawo ro girobai taie neio nakara se iato geremowagomea-rimo. Neio ro ibo, 'Mabu boira edi orobo ro mea ia nibo dehoror dorogara se na-wasia?

⁵ Iedi dehoror ro mani na kaiwai rasiri ie nou ro auna mani kowea ie ina edi mani ro neito nou ro kiwarebai ie namabu tato urubia.' Iedi urubia ro masawe owera to garo-rimo iedi orobo nou aboto.

⁶ Iesu ro neio masawe owera na-gimorowai nou ro ibo, 'E e auna se gimaragoidiro-mo iedi orobo ro nou aboto. Nio ro nou mibo etou ri omio-dumo? Nou ro mea ia tanaro osioidiro mo aboto.

⁷ Ata dodio tato ie namabu tato urubia nio ro kiwarebai aboto, simara ubi tau ato nato aise ba-diwarebidiro-mo. Kaupoti mo nio mutu omidiro-ri pua,

⁸ nedi orobo ro nou simara modobo ato osioidiro-die odio tanaro ro mo aboto dehoror idaibo eputa to na-nemasia-die. Mo ido pamo anama-owea-ri ina bobo to anamadimi-ibiria-ri, nou ro nou ri osioidiro idaibo tanaro.

⁹ Nio mo ro morobise owera nimowauti, nedi mea owera ro mo sapuwo to imese ama-orobodorouti-ri nedi duriomoro gebari ro nato, ibose sirio sabowa ato nedi mea owera ro amadimi-imowauti-ri. Nedi orobo ro beda tanaro osioidiro owera nou sapuwo to ama-orobodorouti-ri urubia ro ibose nou amadime-emaragoidirotiti-ri.'

Iudasi ro gabo gemesioidiro Iesu apoi ri

¹⁰ Ata kowasoro dubu nou masiro Iudasi Kerioti sabowa dubu e nou imese gou turituri urubia neio awawo urubia aboto. Taie nou ro iato gutura neio aboto, 'Iesu mo ro anama-owapotai-ri nio aboto.'

¹¹ Iedi eputa urubia ro neio ro ta-gemowapotai-rimo nou mani omia-ri nou ro edi woko nama-osioidiro-ri nou sapuwo to. Nou ro mea tau iato gosora Iesu neio aboto owapotai ri.

Iesu kowasoro urubia mutu Kimasaudai Soriomu gosioidiro-rimo

¹² Keba saiki ro gereredea nedi soriomu nou kosioidiro aboto Patapata Beredi Kiaupai tato nou soriomu osioidiro rie, ibose sipisipi kainakaina ta-giopiauti-rimo Kimasaudai Soriomu sapuwo to. Ina Iesu kowasoro urubia ro iato garatoro-rimo, 'Nimo ro beda moro ato namadimo-osioidiro-ri nedi Kimasaudai Soriomu ro? Nimo anamadimo-ou-ri nedi soriomu nou osioidiro ri.'

¹³ Taie Iesu ro nato gutura netewa teibo kowasoro dubu teibo aboto ibo, 'Nitiro ba-dou-do auna sabowa to ina ata dubu nitiro ro iato amado-owea-ri obo bageto mutu namadi-ou-ri. Nou beda moto to odorou nou se ba-dobodoro-do io nou se ie moto.

¹⁴ Moto abera ba-demowapotai-do ibo, 'Nimo kitamudiro dubu ro utura-die ibo, 'Modobo ra oro ro nimo moto ipi ata kimapoi aboto Kimasaudai Soriomu osioidiro rie nimo?' " "

¹⁵ Ina Iesu ro ibo, 'Moto abera ro nitiro ama-imowapotai-mari auna negere ibi gugu ohu

ato na-owamo-die, nedi ibi gugu ro nou ro ta-gemododiai. Ohona iato ba-diedea-do.'

¹⁶ Iedi dubu teibo ro na-gorowateai-rido auna sabowa to, Iesu ro beda sosoro owera garo iedi tanaro iato aise gororosioi-di-ro-rimo.

¹⁷ Iedi adimo ro nato Iesu 12 kowasoro urubia mutu atu se na-garadabuai-rimo iho ri

¹⁸ nou ro nato gimowapotai-bi ibo, 'Nibi mo mutu nato na-iho-bimo mo nibi ata ro opia ri anama-apoi-ri ubauba urubia aboto.'

¹⁹ Ina kowasoro urubia ro na-girowai-rimo neio kimaragoidiro ubauba ro girobai neio kamade tato goi-rimo idaibo sosoro owera Iesu ro na-gimowapotai. Ina neio ro Iesu nato gemodoruti-rimo ibo, 'Mo ra o mo pua ra?' Ina ata ro ibo, 'Ee mo ra o mo pua ra?'

²⁰ Taie Iesu ro neio nato gimowameai, 'Nio ata dubu tomidi-ro nato nedi 12 nou maumo ato. Mo mutu edi dubu ro dokou atu basiau to namadi-idobi-ri io nou se ie edi dubu ro mo nou ro nama-apoi-ri.

²¹ Oweru keba tau ato ta-gisioi-di-ro-rimo Tarena Buka ato notamadimo-ororosioi-di-ro-ri. Mo nou se ie Imese Urubia Kiauri Dubu mo ro araburai rie. Kaupoti mo beda dubu ro nama-apoi-ri nou aboto auna ia ubauba tanaro ama-ororosioi-di-ro-ri. Mabu boira nedi dubu ro neito na-garadia-ro? Nou koroto tato rasiri ie, nou aboto ubauba ororosioi-di-ro-ri pua.'

Iesu kowasoro urubia mutu atu se giho-rimo

²² Neio ohona edi kiho ro na-giho-rimo iato Iesu ro patapata beredi na-gomidai-ro nou ro eso owera iato garo Godi aboto. Taie iedi

patapata beredi ro na-gikekeouti imese giaiwai kowasoro urubia aboto. Nou ro ibo, 'Dimade-mo, nou mo durupi ie, ba-diho-mo!'

²³ Ina panikere waini obo mutu iato gomidai-ro eso owera na-garo Godi aboto, taie edi waini obo panikere ro iato giaiwai kowasoro urubia aboto, neio ro iato gemosuwo-rimo kodio.

²⁴ 'Nou mo karima ie imese urubia sapuwo to ama-ororuwo-ri, nedi karima ro neito mo ro urubia sirio anamadi-apopo-ri.

²⁵ Nio mo ro morobise owera nimowapotai waini obo ido mo ro odio-ri pua womu tato Godi edi kiwaboi tanaro ro namadi-orowapotai-ri.'

²⁶ Neio kemowabu ohare na-geremaboduti-rimo taie iato Oribi Podo ohu to imese gidiai-rimo.

Kowasoro urubia ro Iesu amadime-ebedidiro-ri

²⁷ Ina Iesu ro nou kowasoro urubia iato gimowapotai, 'Mo anamadime-ebedidiro-ri nio ro. Godi ro idaibo sosoro owera Tarena Buka ato ta-garo, *Mo ro anama-opia-ri sipisipi kimowotoi dubu, ina sipisipi neio korowadaudio kawa ama-orowadaudio-ri.*

²⁸ Kaupoti mo bobo rido namadi-eribua-ri keremiro anama-owea-ri keba moro anama-orobai-ri Gariri duriomoro.'

²⁹ Ina Pita ro ibo, 'Arua kowasoro urubia beda hata ie oro neio ro amadime-ebedidiro-ri kaupoti oro mo ro beda kebedidiro pua!'

³⁰ Taie nou Iesu ro nato gemowameai, 'Oro mo ro morobise owera nama-emowapotai-ri, Pita nedi duwo ro nato kakaba owera netewa teibo tau to ido amadu-utura-ri, tau keba se mo oro ia ro anama-aratio-ri netewa didi tau to. Oro

ama-utura-ri nedi duwo ro nato ibo “mo umoro pua Iesu.”’

³¹ Pita oweru mutu imese pupuwo ia se gowamo. Nou ro ibo, ‘A! Iesu mo ro idaibo oweru to utura-ri pua ibo “mo umoro pua oro.” Oro namadimo-opia-ri mo ibose to namadimo-opia-ri.’

Arua kowasoro urubia ibose to garo-rimo atu sosoro oweru.

Iesu Godi mutu geremowauti-rido Getesemeni pari ato

³² Iesu nou kowasoro urubia mutu imese gou Getesemeni pari to. ‘Nio nato ba-dorowomidiro. Mo kararatoro moro to nama-ou-ri.’

³³ Iesu ro Pita Iemisi Ioane neibi se gidabuai-bi neibi nou mutu atu se imese gou-birimo. Iesu natonato durupi ta-geremowateai ibose nou kamade tato ie nou giropu kerekere se gowamo.

³⁴ Taie nou ro ibo, ‘Mo kimaragoidiro imese mibo ia se iamo aupise ie mo kataumai. Nibi nato aise domidiro-bimo mo ba-demotoi-birimo norou utua ate atu se namabimi-irarowo-ri.’

³⁵ Taie Iesu neibi aboudo na-giaubai emia ro egea mere se gemopai iato nou kauhio teibo to girodiriti taie nou aise gararatoro. Nou ro ibo gararatoro, ‘Nedi ubauba tanaro namadimo-ororosoidiro-ri modobo ra neio kororosoidiro tato mo aboto?’

³⁶ Idau, oro aboudo modobo ie sirio tanaro kisoidiro aboto. Nedi temeteme ro nama-iwia-ri idaibo ibo ie temeteme obo panikere sosoro ie, mo aboudo ba-dowatateai nedi panikere ro, modobo pua neido kodio. Kaupoti oro ubi beda

sosoro iamo aise ba-mororosioidiro-mo, ibo pua mo ubi.'

³⁷ Taie Iesu iato imese gorowameai kowasoro urubia aboto neibi nou ro norou kirobu-bi moro ato giwia-ibi. Nou ro Pita aboto ibo, 'Saimoni oro norou a-worobu ra? Oro modobo pua ra egea mere se komidiro kirarowo?

³⁸ Norou utua ate aise deremasebidiro-bimo, ba-dararatoro-bimo Godi aboto modobo pua nibi ubauba ro kiwaibia-ibi ibo morobise kimibiria a-wiamo ra mo ato. Nibi ubi ie meamea tanaro kisioidiro aboto kaupoti nibi durupi pupuwo tato iamo.'

³⁹ Iesu ina iato gorowameai araratoro ri atu oweru to gararatoro.

⁴⁰ Kaupoti nou ina na-gorowameai-ro neibi norou ro kiduwuti-bi moro ato giwia-ibi. Neibi ata oweru ata iwapotai pua Iesu aboto, siripo ro girobai-bi.

⁴¹ Iesu ina netewa didi kararatoro aboudo na-gorowameai-ro edi na peteibi ro neibi norou se giatuamo-ibi. 'Nibi norou a-irobu-bi ra? Taie, norou na ie! Aupise ie Imese Urubia Kiauri Dubu ata dubu ro ama-apoi-ri ubauba urubia aboto neio ro orobai ri.

⁴² Nibi ma-diribua-bimo otobowa rie daio ito dirarowea-bimo urubia tou-diomo mo edi na dubu ro nama-apoi-ri nou keba se tou-die.'

Sirio urubia ro gou-rimo Iesu orobai ri

⁴³ Sirio urubia neio na-gou-rimo giri gamini nou mutu gou-rimo Iesu nou isana oweru geremowauti kowasoro urubia mutu. Nedi urubia ro turituri urubia neio edi eputa urubia ro, Mose sabi kitamudiro urubia, Iu eputa

urubia ro gitiodorai-rimo Iesu orobai ri. Iudasi nou Iesu ata 12 kowasoro dubu nou se ie.

⁴⁴ Iudasi ro keba se gabo ta-gisioidiro neio mutu Iesu beda sosoro ra korobai. Iudasi ro ta-gimowapotai 'Mo ro beda dubu nohiai iato nama-osomeai-ri io dubu nou se ie ba-dorobai-mo koko poroporo se, ba-dowou-mo.'

⁴⁵ Iedi gabo ro nou ro keba se ta-gisioidiro, Iudasi neido na-gou Iesu aboto nou ro ibo, 'Kitamudiro dubu!' Nou ro kohiai iato gosomeai.

⁴⁶ Taie Iesu urubia ro aise gohiai-rimo emahodowado pua koko poroporo se gorobidiro-rimo.

⁴⁷ Taie ata dubu ta-gotoi neio mutu iato nou girisipi rido na-gaubidiro-ro turituri urubia eputa dubu nou edi sowake dubu ro giri to sapuwo gare aise gowatua.

⁴⁸ Taie Iesu ro iato gutura, 'Mabu boira nio giri, gamini neio mutu na-wou-dioumo? Mo nio piro dubu ra?

⁴⁹ Mo saiki gabogabo ta-niradabutiti nio mutu, ina nio mo ro ta-nitamudiro-titi Tarena Moto ato, mea oweru to nitomutititi. Iedi tau ro nato mo nio ro nato a-norobai-rimo. Kaupoti nedi tanaro neido ororosioidiro-dumo Tarena Buka ato oweru beda sosoro iamo.'

⁵⁰ Iesu iedi kowasoro urubia ro nou neio ro aise gebedidiro-birimo neio imese gorowadau.

⁵¹ Ina ata orio dubu ibo se Iesu kowasoro dubu e nou keakea obotama goroidiro. Nou edi obotama ro na-goroidiro neio ro gowopirotai-rimo.

⁵² Nou porose se godau obotama neio tu ato geremeserai.

Iesu Iu eputa urubia ro gemodoruti-rimo

⁵³ Iesu edi urubia ro na-gorobai-rimo neio ro nou imese gowou-rimo turituri rubi neio eputa dubu nou moto to, iato neio, Mose sabi kitamudiro urubia, Iu eputa urubia neio ito garadabuti.

⁵⁴ Taie Iesu beda tau ato gowou-rimo Pita nou saro rido musomuso se gobodoro, nou aise gemobodiai iedi eputa dubu nou goto mea moro iato gomi era mabu ato. Nou sowake urubia mutu gomidiro neio atu se era ro giaso.

⁵⁵ Iedi turituri urubia neio eputa urubia, Iu kanisere urubia mutu neio ro ata dubu gosora-rimo, Iesu owapotai ri nou ubauba tanaro kisioidiro sapuwo to iedi dubu ro nou ro owauti ri, ina Iesu nato opia rie. Kaupoti neio ro egea se gosora-rimo.

⁵⁶ Sirio urubia nou sapuwo to ioudo na-goroho-rimo auna ia karasaubuti oweru mutu goroho-rimo. Neio kaupoti gabo ato ou pua kakate ato goroho-rimo oweru mutu.

⁵⁷ Taie arua urubia nou aboto nato gou-rimo nou sapuwo to bagea oweru nato garo-rimo. Neio ro ibo,

⁵⁸ ‘Nedi dubu ro nimo ro ta-nemewidiro-rimo nou ibo na-garo “nedi Tarena Moto ro urubia ro na-gididi-rimo mo ro kototoro ie ina netewa didi saiki ato kididi ie urubia ro ididi-ri pua nedi moto ro.”’

⁵⁹ Kaupoti neio edi oweru to garo-rimo mea se araradebuti pua arua ro ata oweru to karo ie arua ata oweru to karo ie atu gabo ato ou pua.

⁶⁰ Taie turituri eputa dubu, nou eputa urubia

sosoro gabo ato na-gotobowa Iesu aboto nato gutura, 'Oro sapuwo to edi oweru ro na-warow-dumo morobise ra? Oro ro ama-imowameai-ri ra? A? Oro ibose to ama-otoi-ri ra oweru tato?'

⁶¹ Iesu nou ata sosoro dubu e, nou ubauba tato ie, ina noudo ie nou ro ata oweru ata utura pua nou kotoi kawa se gotoi, wisa imowame pua.

Ina iedi eputa dubu ro nou ina iato gemodowa, 'Oro Godi ro kohodowa dubu nou se ra? Nedi dubu ro nimo ro na-nemowabutiti-dumo, oro nou mere ra? Samo to dimowapotai-ro!'

⁶² Iesu ro ibo, 'Io mo nou se ie. Saiki ata mo nio ro anamadimo-owea-ri Imese Urubia Kiauri Dubu mo Godi edi tumodi sapuwo ato nama-omidiro-ri ina ioudo namadi-ororuo-ri tema ohu rido nio ro nato anamadimo-owea-ri.'

⁶³ Taie Iesu oweru iedi eputa dubu ro na-gemororowai nou masawe ri simara obotama aise gorowapepea, taie nato gutura urubia aboto. 'Nimo ro irowidiro-ri pua nou sapuwo to oweru arua urubia aboudo,

⁶⁴ nio ro ta-wirorowai-mo abora ibo nou ro na-warow "Mo Godi sosoro ie." Godi masiro nou ro ubauba owai! Nio beda sosoro imaragoidiro-dumo?'

Neio ro atu se gutura-rimo ibo, 'Nou modobo ie kopia mabu nou ro auna ia ubauba oweru aro!'

⁶⁵ Iesu arua ro iato gamoruti-rimo gase to, arua ro idomari teibo gowasiai-rimo obotama kere to, iato gado-rimo. 'Ma-dapoi oro etu ro ado?' Neio ro ibo gemasosowado-rimo.

Awawo rubi neio edi sowake urubia ro Iesu gomo ato na-gemotoi-rimo neio ro

na-gorobai-rimo nou kadokado imese
gowou-rimo ata ipi to.

Pita ro Iesu a-garatio

⁶⁶ Pita eputa dubu kara goro to ta-godoro nou
iato na-gomidiro iedi eputa dubu nou woko
besere ro gou-ro

⁶⁷ Pita nou ro nato gowea era ro kaso moro
ato. Iedi besere ro nou ro nato geibimai Pita
sosoro ato, taie nou ro ibo, 'Oro Iesu mutu keba
se ta-irohotiti nou Nasareta sabowa dubu e.'

⁶⁸ Kaupoti Pita ro nou a-garatio, 'Oro
arasaubuti, mo umoro pua iedi dubu ro. Mo ata
umoro tato ie oro edi owera to na-warodie!'

Taie Pita iedi moro ro aise gemeserai imese
gou magere damo to. Taie iedi tau ro nato
omona kakaba owera nato gutura.

⁶⁹ Iedi moro ro nato Pita iedi atu besere ro nou
ro ina nato gowea. Nou ro ibo urubia aboto
na-gorowotoi, 'Iedi dubu ro nou se ie Iesu mutu
nou ro irohotiti. Mo ro ta-nowea nou!'

⁷⁰ Kaupoti Pita neido gerepeduai imese moro
to Iesu nou ro a-garatio.

Taie iato tuturu to pua iedi urubia ro
na-gorowotoi Pita mutu neio ro ibo, 'Nimo
umoro ta-iamotiti oro nou se ie nou mutu
ta-irohotiti! Oro Gariri dubu e.'

⁷¹ Ina Pita ro ibo, 'Iedi owera ro na-warodumo
mo ata umoro tato ie nedi dubu ro! Mo
morobise owera naro. Mo nama-arasaubuti-ri
Godi ro mo ubauba ba-mowai-ro!'

⁷² Ina iato kakaba owera ro gutura.

Taie nedi kakaba owera ro Pita ro na-girowai
nou kimaragoidiro nato giwameai Iesu beda
owera garo keba se ibo, 'Kakaba owera netewa

teibo tau to ido amadu-utura-ri, tau keba se mo oro ro netewa didi tau to anama-aratiouti-ri.' Pita giropu peke se gutura taie nou iato aborabora ro gorobai idobi imese giroto.

15

Iesu gabamani dubu Paireti nou aboto gowou-rimo

¹ Turituri rubi neio eputa urubia arua, Iu awawo urubia, Mose sabi kitamudiro urubia imese Iu kanisere urubia neio sirio se ta-garadabuti-rimo atu moro to. Ina kowaroho duwoduwo ato Iesu kopia sapuwo to kaupoti moro to oweru mea se gemobodiai. Taie iedi Iu eputa urubia ro Iesu neio ro na-gorobai-rimo iato gemotohiti-rimo, imese gowaboi-rimo Roma gabamani auna dubu aboto masiro Paireti.

² Taie Iesu Paireti ro nato gemodowa, 'Oro Iu eputa dubu nou se ra?'

Ina nou ro neito gemowameai, 'Oro beda sosoro aro-die, io nou se ie.'

³ Taie Iu eputa urubia ro inaina bagea oweru aise gimogu-rimo nou sapuwo to. Neio ro ibo, 'Nedi dubu ro nou ro ubauba tanaro ta-wisiodiroditi morobise ie.'

⁴ Taie Paireti ro ina nou nato gemodowa, 'A-irowidiro ra? Oro ro neio wisa beda ito ama-imowameai-ri? Oro ibose to ama-otoi-ri ra oweru aro tato?!'

⁵ Iesu nou ata sosoro dubu e, nou ubauba tato ie, ina noudo ie nou ro wisa imowameai tato. Paireti woki ro gopia mabu Iesu nou ro na-giauri oweru tato na-gotoi.

Iesu karaburai oweru Paireti ro gemowapotai

⁶ Kisimisi gabogabo ato Iu urubia Kimasaudai Soriomu kosioidiro ato Roma Gabamani auna dubu nou sirio tau ibo irowatititi kaupoti dubu dibura rido nou ro kemeiriai ie, Iu urubia beda dubu aboto iamo ubi io neio ro masiro to na-wapoi-dumo taie Gabamani ro iedi dubu ro nato kemeiriai ie sabowa to.

⁷ Iedi tau ro nato amia Iu urubia ubi ie Roma urubia kiwagare Iu duriomoro rido, ina nou ri Roma urubia giesu-rimo pamo se. Taie iedi urubia ro iedi tanaro ro na-gosioidiro-rimo neio imese sirio se dibura to aise giedea-rimo Roma boso urubia ro. Barabasi ata nou se ie urubia nou mutu giopiauti-rimo.

⁸ Taie iedi tau ro nato Iu urubia sirio ta-garadabuti auna topira ro gorobu, taie nato gou-rimo Paireti aboto, nou ro kaupoti dubu owatateai ri dibura aboudo, nou idaibo sosoro na-irowatititi kisimisi gabogabo ato. Taie neio ro ibo, 'Oro ro modobo ie ata dubu ata sabowa to kemeiriai.'

⁹⁻¹⁰ Paireti umoro ta-goi turituri rubi neio awawo urubia Iesu neio ro na-gohoio-rimo mabu urubia sirio ro Iesu oweru irowidiro-mo, Iesu nou ri gowou-rimo nou aboto. Ina Paireti ro iedi topira gebari ro neito gimodowa, 'Nio ro edi dubu ro na-wasoro-dumo "Iu Eputa Dubu" to nio ubi ra nou mo ro kemeiriai sabowa to?'

¹¹ Taie iedi turituri rubi neio awawo urubia ro topira maumo ato urubia neio ro nato gimowapotaidiro-rimo ibo, 'Paireti namadi-utura-ri ibo "etu namadi-emeiriai-ri mo ro sabowa to?", nio ro ibo ba-dutura-mo

“Barabasi ro ba-morowameai sabowa to!” ‘ Taie iedi tanaro aise gororosioihiro.

¹² Taie Paireti ro urubia sirio iato gimodowa, ‘Iesu nio ro asoro-dumo ibo nou Iu eputa dubu e, ina beda mino to nama-oworohuti-ri nou?’

¹³ Neio iato binio to giaiauti-rimo, ‘Nedi dubu ro meremopoguti ota kemowotowa ato!’

¹⁴ Ina iedi Roma gabamani dubu ro nou ro ibo, ‘Mabu boira? Nou beda sabi gesebea?’

Nou neio ro masawe to ina iato gemowameai-rimo auna se ‘Meremopoguti ota kemowotowa ato!’

¹⁵ Taie Paireti ro urubia ubi aise gomidai. Taie nou ro Roma boso urubia iato gimowapotai Barabasi owosuruo ri dibura rido, ina wisa na Iesu kerei to epesuti ri ina nato emopoguti rie ota kemowotowa teibo ato iato araburai ri.

Roma boso urubia ro Iesu a-gemasosowado-rimo

¹⁶ Roma boso urubia ro Iesu na-gorobai-rimo gabamani edi moto ato imidirotiti sibura bobo to ito iato gowodoro-rimo. Taie neio ro arua boso urubia iato giramairiai-rimo neio atu moro to imese garadabuti-rimo.

¹⁷ Taie neio ro Iesu obotama na-gowopurutai-rimo karima obotama iato gowori-rimo eputa urubia neio karima obotama beda sosoro wiroidirotiti-mo, nou idaibo sosoro gowati-rimo. Neio ro ununu kumabo ta-gemawiauti-rimo nou iato gemamitai-rimo eputa ato, eputa urubia neio beda sosoro hatu iroidirotiti-mo ina idaibo sosoro gemowati-rimo.

¹⁸ Neio ro ibose bagea to garo-rimo nou aboto ibo, 'Tu urubia eputa dubu oro tuturu tau to imidirotitiwai-ri.'

¹⁹ Ina edi boso urubia ro Iesu gonopu to eputa to iato gado-rimo, gase to iato gamoruti-rimo woidomari abo, arua ro bagea to na-giroboreauti-rimo iato gemowabu-rimo.

²⁰ Neio ro nou kemasosowado na-goroporeai karima obotama na-gowopirutai-rimo, taie nou simara obotama iato gowori-rimo. Nou ioudo imese gowosuruwo-rimo opia moro to emopoguti ri ota kemowotowa teibo ato.

²¹ Iedi tau ro nato Saimoni gabo ato gowea-rimo Sairini sabowa dubu e Arekasanida ra Rupasi ra neitiro abera ie. Nou boso urubia ro gemutura-rimo ibo, 'Ei oro ro demaratai Iesu ota kemowotowa.'

Iesu ota kemowotowa ato gemopoguti-rimo

²² Iesu neio ro imese gowaboi-rimo ata damera to masiro Gorogota. (Gorogota Damera urubia dubu eputa soro sosoro ie.)

²³ Neio ito na-gorowateai-rimo arua rubi ro nou meresini iato gemowou-rimo odio ri temeteme kemadibiai aboto, kaupoti nou eputa se geweisorai nou ro odio pua.

²⁴⁻²⁵ Taie Roma boso urubia ro kowaroho saiki ato gemopoguti-rimo ota kemowotowa ato, taie neio durumai iato geremewehere-rimo, etu durumai ro a-gobeidiro tuturu tau to Iesu obotama nou ro komidai ie. Nou obotama sirio idaibo sosoro mino to gowamade-rimo.

²⁶ Neio ro eputa abato idaibo titi nou iato gematiti-rimo ibo, *Nou Iu Urubia Eputa Dubu e.*

27-28 Sabi edi dubu teibo ro na-isebotiti-do neitiro ibose to gimopoguti-marimo, ata nou tumodi sapuwo ato, ata nou pere sapuwo ato neitiro ibo giroridiro-ma kemowotowa teibo ato.

29 Urubia ro Iesu na-gorohudirio-rimo, neio eputa se giweisorowado-rimo nou ubauba oweri iato gomio-rimo ibo, 'Nou e oro ma-dowea umoro a-woi.'

Arua ibo garo-rimo, 'Ae! Oro ibo na-garo keba se "Mo ro kototoro ie Tarena Moto ina netewa didi saiki ato kididi ie." Ina oro abora bida ra?

30 Ma-derebedai-ro ota kemowotowa rido!'

31 Turituri rubi neio awawo urubia, Mose sabi kitamudiro urubia neio ibo se iato ta-goroho-rimo, neio ro nou iato gemasosowado-rimo. Neio iato geremowauti-rimo, 'Nedi dubu ro nou arua urubia se iwarebidirotiti ina mabu boira nou nakara se orowarebai tato?

32 Nou morobise ia Godi kohodowa dubu ato, ibose nou morobise ia Iu urubia eputa dubu to na-warasoro, nimo ro namadimo-owea-ri nou kerebedai moro ato morobise to nato namadimi-imibiria-ri.'

Ina iedi na dubu teibo ro sapuwo sapuwo ato na-giroridiro-ma ota kemowotowa ato neitiro ibose Iesu ubauba oweri ta-gomio-rido.

Iesu a-garaburai

33 Saiki turi rido womu tato adimo saiki na-gereredea iedi duriomoro gebari ro duwoduwo ro imese ta-gatimuti. Iedi duwoduwo ro imese ta-gowamowado-ro womu tato adimo saiki ro ti-gorobai.

³⁴ Taie adimo ato Iesu nou auna ia iamo nato gutura simara owera to, *Eroi Eroi Rama Sabakatani!* Nou maumo owamo ibo, *Godi! Godi! Mabu boira mo oro ro na-nemauriai-die?!*

³⁵ Urubia arua iato etio ro gorowotoi neio ro ibose nou iamo ta-gemorowai-rimo kaupoti neio ro mea se imidai pua. Neio ro ibo, 'A-emorowai-mo nedi dubu ro Eraia arahuomai.'

³⁶ Taie tuturu to pua kaupoti dubu nou obotama kere iato na-godobia karakara waini obo to, iedi kososouti obotama kere ro gonopu mutu na-gematahiti iato gemowioihiro nou ro karakara waini obo ioudo imusubai ri. Nou ro na-gemowioihiro, taie iedi dubu ro nou ro ibo, 'Egea mere se memotobowa-birimo, etu umoro ra Eraia nou amadi-ororuwo-ri Godi ipusu owera dubu nou ro ama-ebedai-ri, ota kemowotowa ohu rido.'

³⁷ Taie Iesu nou auna ia iamo nato gutura taie iato nou aise garaburai.

³⁸ Tarena Moto goro ato auna obotama ta-wororidiroititi. Ibi gugu kainai imese tarena ia ie iedi obotama ro Godi sosoro nou ro owasioihiroititi. Iesu pamo na-gowea edi obotama ro turi ato aise gerekekeai-rido, ohu rido garatamuai-ro kerekekeai aise gororuwo-ro sopu to.

³⁹ 100 boso urubia iedio eputa dubu ro na-iaurititi nou ibose ti-gotoi Iesu sosoro gabo ato, nou ro ta-gowea Iesu karaburai moro ato. Nou ro ibo, 'Nou morobise Godi ia mere ie.'

⁴⁰ Ibose edi mamio ro gorowotoi muso rido neido girarowo-rimo etou tanaro gororosioihiro-rimo nou giauri-rimo. Nedi

mamio ro neio ro gorowotoi Maria Magadarena, Sarome, ina ata Maria, Iosepa orio Iemisi neitiro mamu e.

⁴¹ Iesu neibi ro owarebidirotiti-bimo Gariri duriomoro ato. Ibose arua mamio Iesu mutu Ierusarema sabowa to na-godoro-rimo neio ibose idomari ri ta-gou-rimo.

Iesu pamo durupi nadi goro to gibiria-rimo

⁴²⁻⁴³ Iosepa nou ata auna masiro dubu e kanisere ato, nou Aramatea sabowa dubu e. Nou kimibiria ta-owamotiti Godi edi kiwaboi tanaro ro nou emotoititi nou ro. Iedi saiki ro nato Iu urubia komidiro saiki sapuwo to namabu a-geremododiai-rimo. Adimo na-gereredea-ro Iosepa nato gou Roma gabamani eputa dubu Paireti nou ro gemotobowa, tere ro owati pua. Taie nou ro nato garatoro Iesu pamo durupi ebedai ri ina ibiria ri nadi goro to.

⁴⁴ Paireti a-giwagogorai Iosepa beda owera gutura ibo Iesu ta-waraburai mabu nou tuturu to ororidiro pua. Nou owera iato gemeiriai 100 boso urubia eputa dubu aboto nou Gorogota Damera rido ou ri Paireti aboto. Iedi dubu ro iato gou-ro, taie Paireti ro ibo, 'Iesu a-waraburai ra?'

⁴⁵ Ina iedi boso dubu ro nou ro ibo, 'Io ta-waraburai.'

Taie iedi gabamani dubu ro nou ro na-girowai iedi owera ro ina Iosepa aboto nato gutura ibo, 'Iesu pamo durupi ba-debedai-ro!'

⁴⁶ Tauro Iosepa keba se Iesu durupi oupiriamuti na keakea obotama se gememidai-ro iato nou ro Iesu durupi mea mino to neito goupiriamuti, taie nou durupi nadi goro

to iato gibiria. Taie nou ro boroboro nadi iato gowawodorowado magere damo neito gemopai.

⁴⁷ Maria Magadarena, Iosepa mamu Maria neitiro ro giauri-rido Iesu pamo durupi beda moro to gedea-rimo.

16

Iesu a-geribua pamo rudo

¹ Komidiro saiki adimo na-goroporeai, Maria Magadarena, Sarome daro orio Iemisi edi mamu ro Maria neibi ro meamea nibo dehoru nato gimade-birimo Iesu durupi emadiriti na.

² Ina iato Sande saiki na-gowaroho iedio mamio ro Iesu beda nadi goro to gibiria-rimo neito gou-birimo nou durupi meamea nibo dehoru neito emadiriti ri.

³ Taie neibi nakara se nato geremowagomea-birimo ibo, 'Nou magere auna ia nadi to gemopai-dumo etu ro nama-iwarebai-biri neibi, modobo ra neibi aboudo?' Neibi na-gou-birimo neito geremowagomea-birimo.

⁴ Neibi idomari neido na-gimeriai-birimo keba moro to neibi ro nato gowea-birimo bobo magere a-gaidiro-ro. Iedi auna nadi gebari ro potoro ie gomo ato imese gowamo.

⁵ Iedi mamio ro nadi bobo to na-godoro-birimo neibi ro nato ata orio dubu se gowea-birimo na-gomidiro, nadi goro ato, nou keakea obotama to ta-geremeduti, tumodi sapuwo ato gomidiro. Neibi ro nou na-gowea-birimo omidiro moro ato neibi iato a-gimugugurai-bi tere ri. Neibi orowadau rie

⁶ kaupoti iedi dubu ro nou ro ibo, 'Ee, tere na ie nibi. Mo umoro ie nibi edi mabu ato ou-diebingimo neito. Nibi Nasareta dubu Iesu nou osora-diebingimo dutu ata na-gemopoguti-rimo ota kemowotowa ato. Iedi dubu ro nibi ro na-osora-diebingimo nou nato orobu pua pua ie. Nou pamo pua, keremiro ie! Ta-weribua ma-dowea-birimo nou edi moro ato gowotodai-dumo, pоторо ie nou nato.

⁷ Nibi abora neido dorowameai-bimo Pita ba-demowapotai-bimo arua kowasoro urubia mutu ibo "Nio ba-dou-mo Gariri duriomoro to Iesu mutu iato amadimo-ororowea-ri, nou ta-waimai keba moro to. Nio nou ro keba se ta-gimowapotai idaibo owera to." '

⁸ Iedi mamio ro neibi iato imese gerereauri-birimo neibi auna ia tere ro giwati-bi soro aise gorowamaro. Iedi mamio ro ioudo na-gororoupiriai-birimo urubia neibi ro imowauti pua beda tanaro gowea-birimo mabu neibi auna tere ro giwati-bi.

Iesu keba ia se sosoro Maria Magadarena ro gowea

⁹ Sande kowaroho duwoduwo ato Iesu na-geribua pamo rudo, nou keba se sosoro a-gorowawea Maria Magadarena aboto. Keba se iedi orobo ro nou aboudo 7 ubauba urio nou abato ta-irowomidiroiti ina Iesu ro gimabodorai-ro owera to nou aboudo.

¹⁰ Taie Maria Magadarena ro Iesu ta-gowea nou iato otoi pua aise gorowameai-ro hio to, Iesu edi urubia mutu na-irohotiti neio imowapotai rie, neio wisa na a-gorowomidiro idobi giroto-rimo pape gorowomidiro. Taie

Maria Magadarena ro nato gimowapotai ibo, 'Iesu abora pamo pua, nou ta-weribua-ro, mo ro sosoro se nowea na-wotoi!'

¹¹ Kaupoti edi kowasoro urubia ro neio ro nou beda sosoro gutura neio ro imibiria pua.

Kowasoro dubu teibo ro Iesu gabo ato sosoro se gowea-rido

¹² Kowasoro dubu teibo Ierusarema sabowa na-gemeserai-rido ipi gabo ato Iesu neitiro ro nato sosoro se gowea-rido. Taie Iesu neitiro ro na-gowea-rido keba se edi sosoro woidomari ro na-giworohuti ibo pua, nou ta-garatidiai ata sosoro gorowawea neitiro aboto.

¹³ Taie neitiro ro na-gowea-rido hio to aise gorowadau-rido borubi imowapotai ri. Taie neitiro ro ibo, 'Iesu neitiro ro ta-nowea-do gabo ipi ato.' Kowasoro urubia na-gorowomidiro neitiro edi owera ro na-garo-rido neio ro imibiria pua.

Iesu kowasoro urubia aboto gorowapotai

¹⁴ Neio moto goro ato gorowomidiro ohona giho-rimo iato tuturu tau to owamo pua Iesu nou sosoro nato gorowapotai nakara se 11 kowasoro urubia aboto. Iesu neio aboto koko owera nato garo mabu neio imibiria pua mea se, ibose neio ubi tato ie edi urubia ro giauri-birimo Iesu pamo rido na-geribua neibi owera kimibiria aboto, neibi ro edi owera ro neito na-giatodai-birimo neio neito aise gimohumai-birimo.

¹⁵ Taie nou ro nato gutura kowasoro urubia aboto, 'Nio ba-dororoburutai-mo duriomoro gabogabo to ba-doroho-mo. Nedi mea owera ro

nio ro ba-dobodorouti-mo imese sirio urubia aboto.

¹⁶ Etio ro imibiria-dumo iedi mea oweru ro mo sapuwo to, ina ibose obo to na-iwarumiauti-dumo, neio keremiro amadimo-owea-ri. Etio ra kimibiria tato iedi urubia ro saiki ata Godi edi auna koto ro nato ama-orowotoi-ri ubauba wisa amadimi-imidai-ri.

¹⁷ Iedi urubia ro na-imibiria-dumo mo edi mea oweru ro neio mo aboudo pupuwo amadimi-iwia-ri korosa tanaro isioidiro-ri. Mo pupuwo ato neio ro ubauba urio amadimi-imabodoidiro-ri. Neio ro arua urubia oweru umoro koi tato, io neito amadima-aro-ri.

¹⁸ Etio ra umoro tato tanaro kisioidiro idaibo bagawe tu to kirobo, soma isi obo kidio, neio temeteme iauri-ri pua. Neio ro ibose amadimi-iwaseidiro-ri temeteme rubi ina neio aboudo temeteme aise amadima-aragarewado-ri.'

Godi ro gowameai Iesu Adiri to

¹⁹ Iesu nou kowasoro urubia oweru kimowauti na-goroporeai iato nou Godi ro aise gowioro toboro ohu to, nou ito na-gorowateai Adiri to Godi edi tumodi sapuwo ro nou nato gowomi.

²⁰ Taie iato kowasoro urubia orowomidiro pua, neio aise gororoburutai-rimo duriomoro gabogabo to. Nou edio mea oweru ro nato gobodorouti-rimo urubia neito gimowauti-rimo. Iedi kowasoro urubia ro Abera naramu ro ta-giwarebai-ro, pupuwo korosa ta-gimia, korosa tanaro neio ro neito gisioidiro-rimo. Urubia ro neio na-giauri-rimo iedi korosa tanaro ro na-gisioidiro-rimo neio ro ibo 'Nedi oweru ro

morobise owera ie!' Ina neido ie urubia ro
morobise to gimibiria-rimo.

(Mea owera Iesu sapuwo to Mareko ro
gisioidiro nou se ie.)

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4